


ZAZI LANI FA KALVARI

 Ni itumezi, Muzwale Neville. [Muzwale Neville uli, “Ufuyolwe muzwale, muzwale!”—Mu.] Mulimu aku fuyole, Muzwale Neville. Ni itumezi, hahulu luli.

² Ki kakusasana, balikani. Ki lithonolo kuba la mo mwa tabernakele hape, kakusasana cwana, ku to sebeleza Mulena, ka nzila ya kukutaza Linzwi ni ku lapelela bakuli. Mi Ni itumezi hahulu ka lizazi le.

³ Mi Neni komokile, hane Ni kena mwahali. Muzwale natile sa bulela kuli, “Hanilati kuba sina wa mbingwa ya sa swaneli ya na folisizwe.” Ki Muzwale Wright. Ne ni mu lapelezi, mi Mulena u mu folisize ka kutala. Mi ki ha taha, inza lila, ku to swala lizoho laka, mi abulela kuli—kuli ubata ku lumba Mulena ka—ka ku foliswa. Na bata kukuta kuli atofa buitumelo. Kaufela lifelile. Yena—yena uiketile hande cwale. Lu itumezi ka bupaki bwani.

⁴ Cwale Charlie, wena ni Muzwale Jeffries, haiba mwa lata, mutahe kwanu mutoina kwa lipula za kwa pata kwanu. Mi mu amuhezwi ni kufita, kuli mu si ke mwa yema. Muzwale yomuñwi kwani, ni Muzwale Wood, amutahe fela kwanu. Mu ka . . . Kuna ni libaka, ki libaka zepeli kwanu fa sipula, kuli mu si ke ku yema. Na lumela, libaka zepeli nyana kwanu, mi, eeni, mu ka amuhelwa hahulu ni kufita kuli mu to nga libaka ze.

⁵ Lu tabile kwa . . . Na lumela ne ku bulezwi, ka nako yeñwi kuli, “Ne ni tabezi hane ba ni bulelezi . . .” Mulimu aku fuyole, muzwale. [Muzwale uli, “Kamita ni tabelanga kuba bukaufi ni mukutazi.”—Mu.] Ni itumezi. Ni itumezi, Ni itumezi. “Ne ni tabezi hane ba ni bulelezi kuli, ha luye kwa ndu ya Mulena.” Lani kona lithonolo la Mukreste ni tabo, kuya kwa ndu ya Mulena.

⁶ Ha nitalima kwa ni kwa, ni bona buñata bwa balikani baka mo, kakusasana cwana, Ni tabezi hahulu ka se. Ni tabezi fa kubona Muzwale ni Kezeli Dauch kwanu, kuzwa kwa Ohio. Ni bona Muzwale ni Kezeli Armstrong kwa mulaho kwani, kuzwa kwa butelele bwa Ohio. Mulimu ami fuyole, ni mina. Mi, oh, kutalima fela kwani ni kwa, mu bona babañata hahulu, ku ka ni tatafalela kubiza mabizo abona. Kezeli Hoover, lutabile ka ku kubona, kakusasana cwana, kuzwa kwani kwa Kentucky. Mi Charlie ni Nellie, Muzwale Jeffries ni lubasi lwa hae, ni babañata fela ba baliteni, baba zwile kwande a tolopo.

⁷ Kacwalo lu kulubela nako yende ku Mulena, kakusasana cwana, lu kulubela kuli Mulimu akopane ni luna ka mukwa wa ku fuyola mioyo ya luna ni ku kutaza ku luna lika ze lu tokwa.

⁸ Mi sina ha Ni talima mwa sibaka se, kambe Ne ni ka biza balikani baka kaufela baba liteni mwahali mo, Ne ni ka

nga siemba tuna sa kakusasana, kubulela baba shutana. Si ni utwisanga hande ha ni kutelanga kwa keleke, ka kubona batu kaufela mwahali, ha ba kopani.

⁹ Ku kaba cwani haluka yo fita kwa Lihalimu, mi lu yo kopana Kwani ka nako yani ya kamita, Kopano ya kuyakuile hamoho, ku potoloha Lubona lwa Mulimu, ni limbuyoti kaufela ze lu lata luli? Luna, Kwani, luka bupiwa mwa sibupeho sa Hae, mi ni mwa siswaniso sa Hae, ni Moya wa Hae fahalimwa luna, ku to lapela ni ku sebeleza Yena Kuyakuile kaufela, haluna kuba ya ka katala.

¹⁰ Munahane fela, hakuna sika sisili se mukona ku nahana ka sona, se mukona kueza, kono kasamulaho wa nako nyana mwa katala kueza cwalo. Charlie, Na sepa wena ni Na lu zumile tumale kufita sika kaufela sene lu tabela kueza, ka nzila ya sani, kono, mwa ziba, mu ka katala ku si ezanga.

¹¹ Mi Ni—Ni tabela ku—ku pahama, kukena mwa malundu ni kupahama cwalo. Kono Na katalanga, linako zeñwi, mu tabela kueza sesiñwi fela.

¹² Mi Ni tabelanga ku zamaisa mota. Fokuñwi Ni ikutwa ku katala ni ku boteha, ni misinga ya yema. Ni ka tulela fela mwa mota ya ka ni kufunduka, ni kuswala kwa mukoboco, kuya ni shetumuka mwa nzila, kuopela kuli, “Ni tabile kuli Na kona kubulela kuli Ni alimuñwi wa bona,” kamba yeñwi. Ku swala fela mukoboco wani, ni kuopela, ni kuhata liutu la ka, ni kuhuwa. Mi, kihande, kasamulaho nyana, Na katala, mi ha Ni kutela kwa lapa ni kalisa sika sesiñwi.

¹³ Kono halu ta yo fita kwa ku lapela Mulimu mwa Mubuso o munca wani, hakuna ku yo ba nako ya ku katala, ikaba—ikaba fela mbuyoti kamita, ka kuzwelapili ni kuzwelapili. Kono, kakuli, luka cinciwa ka nako yani. Haluna kuba sina mo lu bezi cwale. Luka shutana, libupiwa ze shutana ka nako ye. Kaewalo, lutabile.

¹⁴ Ne ni sweli fela ku nahana. Hanizibi kamba Ni kile na bulela cwana, kubulela se kamba kutokwa. Muzwale Charlie, nako yeñwi yefelile, Ne nili kwani kwa Kentucky ni yena, mi ki hali, “Muzwale Branham, unahana kuli, mwa Mileniamu, wena ni Na lu ka yo zumanga tumale?”

Se nili, “Hani sepi cwalo, Charlie.”

¹⁵ Ali, “Kihande, ne lu tabelanga cwalo hahulu,” ali, “wena—wena unahana kuli luka eza cwalo ha lu kaba mwa Mileniamu?”

Se nili, “Batili, hakuna kuba se si ka bulaiwa mwa Mileniamu.”

Mi ki hali, “Kihande, ne lu tabelanga fela cwalo.”

¹⁶ Se nili, “Charlie, kucwani kambe ne Ni ka ku kolwisa kuli nako yeñwi no li kulube, mi wa hula kuba ya pahami nyana, ku

to ba mutu ya? Kana no ka kutela hape, ku tabela kwa ku yo ikola minyaka wa kulube?”

Sali, “Batili.”

17 Se nili, “Wabona, no kaba ya pahami hahulu kufita kulube, cwale, wena so li mutu, no si ke wa tabela kuli ube kulube ni kamuta.” Se nili, “Cwale u alule seo ka linako ze likiti ze lishumi, mi cwalo kona mo mu kabela hamuse mu cincizwe kuzwa fa ku ya ku se mu ka ba. Hamuna ku tabela kuli mu be batu hape.”

18 Yeo ki niti. Ikaba si ka se si shutana. Ni tabezi hahulu ka mihupulo yateñi, ka kuziba kuli zazi leliñwi lu ka pahama ku ya mwa halimu.

19 Kihande, cwale, haiba Mulena wa lata, la Sunda lelitatama, le likaba la. . . Kona Ni ka funduka, kuya kwa Wyoming, ni mulikani yomunde; kamba kuya kwa Idaho, ni mulikana ka yomunde, Muzwale Miner Arganbright, Muzwale Clayt Sonmore, Baana ba Pisinisi ya Sikreste.

20 Sunda yetaha, sunda ya kasumulaho wa yetaha, ki cwale; la 7, Ni lukela kuba mwa—mwa Dallas, Texas, kwa Mukopano wa Linzwi la Foliso. Mi busihu bo ni ka kutaza ki la 7. Mi hape kona Ni ka kuta, kuya kwa Idaho ni Muzwale Arganbright ni Baana ba Pisinisi ya Sikreste. Mi mwendi ni kuba ni busihu bulibuñwi kwa Minneapolis, lu si ka yo kuta kale. Mi hape ni mukushuko ulimuñwi wa Baana ba Pisinisi ya Sikreste.

21 Mulena wa lata, la Sunda le litatama kakusasana Ni bata ku yo kuta kwanu kwa tabernakele hape, mi haiba sani si lumelezwa ni kuba tato ya Mulena. Mi Ni bata ku ambola fa tuto yakuli *Kakundukundu Mwa Liñungwa*, haiba nji Mulena wa lata. I bonahalile kuba fa pilu ya ka, sunda kaufela.

22 Mi kakusasana omuñwi, ka mapakela luli, ka foo kiloko ya kakusasana, Ne ni zuhile Nina ni munahano wo, “Zazi lani fa Kalvari.” Mi Ni bata kubulela ka wona, kakusasana cwana: *Zazi Lani Fa Kalvari*.

23 Mi cwale ka palo ye, halu apuleñi mwa Libibele zaluna, mwa Mañolo, kwa Evangeli ya Muñoli Mateu, fa kauhanyo yabu 27. Mi lu ka kala ka timana ya 27 ni kubala siemba sa Liñolo le, kuli lu be ni makalelo a teni, konakuli lu ka kala ona fa. Mi kasumulaho wa kutazo ya sebelezo, kona lu ka ba ni ku lapelela bakuli.

24 Mi, oh, kuzwa nako ye felile kwanu, hane ni mano kuta fela, mi kuama fa mufuta wa bulumiwa bwaka bo bunca. Ni na ni bupaki bo buñata hahulu kuzwa mwa mukopano wani kufita mo Ni bezi ku omuñwi kaufela fa nako yetelele.

25 Kuna ni sesiñwi ka wena, kuli mukone ku swalana ni mutu, hakuna taba ka mo libonahalela za moya cwani. Kono, mwabona, foliso ilukela kuba fa tumelo ya mutu. Cwale, haiba mutu una ni tumelo ya hae. . .

26 Mi ba bona, sina, Moya o Kenile uya fa halimwa sicaba mi uli, “Li ka *Za kuli-kuli* li ezahalile. Mi, sani, *mukete-mukete* wa libizo leli cwana. Mi u zwa kwa sibaka sa *kuli*. Mi sika sa *kuli* so ezize. Mi ku kaba *cwana*.” Mi mubone kaufela zona ha li ezahala ka nzila yani!

27 Ibo, mutu anosi, inza inzi fani, ulukela kutalima mwa halimu ni kubulela kuli, “Yani ulukela kuba Mulimu. Na amuhela foliso ya ka.”

28 Kono, mwa sibaka sa lika zani, mutu ubulela kuli, “Beya mazoho kuna mi uni lapelele, kuli Ni foliswe.” Kono yani kona nzila ye lu lutilwe mo mwa America, mi, kacwalo, ki kulumela zani. Mi sani kaniti ki sa Mañolo.

29 Kono cwale lu fumana cwana, mwa Africa ni libaka ze shutana, ku sa ezahala fela si ka se si cwalo, nyangela kaufela ya kamuha ka nako iliñwi, ku to amuhela foliso ya bona, kakuli hakuna se ba lutilwe. Mwabona? Mane ha ba si ka lutwa ni haiba foliso. Mi cwale ha ba bona sani, ba ziba kuli kuna ni Mulimu ya pila. “Mi haiba Wa pila, Ki—Ki ya mata kaufela, mi Wa—Wa folisa.” Mi kona cwalo, kakuli za makalelo li tomilwe kale, ona mutomo, kuli Yena ki mufolisi, mi wa folisanga batu. Mi cwale ha ba bona Kubateni kwa Hae ku nze kubeleka mwahala Keleke ya Hae, konakuli ba li, “Ani kona mafelelezo. Zani kona fela ze lutokwa.”

30 Kono luna lu lutilwe, “kubeya mazoho fa bakuli,” ni lika ze cwalo. Lani kona libaka ha li sa beleka hande mwa America.

31 Cwale, muhupule, kakusasana la Sunda yetaha, haiba Mulena alata, Muzwale Neville u ka zibahaza, ka niti. Mi . . . ki . . . *Kakundukundu Mwa Liñungwa*.

32 Cwale, Ne ni mifa nako nyana kuli mu kwalule Mañolo a mina, ku Mateu 27. Halu kaleni kubala fa timana ya—ya 27, ya Evangeli ya Muñoli Mateu. Cwale lu teezezeni ka tokomelo kwa palo.

*Mi masole ba mubusisi banga Jesu ku muisa fa kuta,
ba mu kubukanyeza sitopa kaufela sa masole.*

Mi ba mu tubulisa, ba mu apesa kubo ye fubelu.

*Ba tata miutwa ku mu ezeza kuwani ya bulena, mi ba
mu apesa yona kwa toho, ba mu swalisa kataka kwa . . .
lizoho: ba kubama fapila hae, mi ba mu soma, bali,
Yosho, Mulena wa Majuda!*

*Mi ba mu kwelaka mati, banga lutaka, mi ba mu nata
kwa toho.*

*. . .ba feza ku mu soma cwana, ba mu tubulisa kubo
yeo, mi ba mu apesa liapalo za hae, kiha ba muisa ku yo
kokotelwa.*

Mi ha ba zwa, ba fumana mutu wa kwa Sirene, wa libizo la Simoni: ba mu hapelezwa kuli alwale sifapahano.

Mi ba mano kambama, bafita fo kubizwa Gologota, kikuli sibaka sa katendele,

Ba mu tambeka veine ye zwakilwe ni nyoko: . . . kono ha lupile kwateni, a hana kunwa.

Mi ba mu kokotela, ni ku pazula liapalo za hae, ni ku laula: kuli ku talelezwe sene si bulezwi ki mupolofita, Neba ikabezi liapalo za ka mwahala bona, mi fa libyana za ka ba laulela fateni.

. . . baina mo mi ba mu libelela;

Mi ba beya . . . fahalimwa toho ya Hae liñolo la mulatu wa hae le li li, YO KI JESU MULENA WA MAJUDA.

Cwale nekuna ni lisinyi zepeli zene ba kokotezi ni yena, sesiñwi ku la silyo, mi sesiñwi ku la nzohoto.

Mi baba—baba fita ba mu lwaha, ni ku mu sisinyeza litoho,

Mi bali, Wena ya wisa tempele, mi u i yaha mwa mazazi a malalu, u i pilise. Haiba ki wena Mwana Mulimu, utuluke fa sifapahano.

Kamukwaocwalo ni bona baprista ba bahulu ba mu soma, ni bañoli ni ba bahulu, bali,

U pilisize babañwi; yena hakoni ku i pilisa. Haiba ki yena Mulena wa Isilaele, cwale ha tuluke fa sifapahano, mi lu ka mu lumela.

Na sepile ku Mulimu; ha mu lamulele cwale, haiba uka mu pilisa: kakuli na ize, Na ni Mwana Mulimu.

Ni zona lisinyi hape, zene kokotezwi ni yena, neli mu tapaula cwalo ka milomo ya zona, fa mulomo wa hae.

Cwale kukala ka hola ya bu sikisi kwaba lififi mwa lifasi kaufela kuisa ka nako ya naini.

Mi ka hola ya bu naini Jesu a huwa ka linzwi lelituna, ali, Eloi, Eloi, lama sabaktani? Fo kikuli, Mulimu wa ka, Mulimu wa ka, uni tuhelezi ñi?

Babañwi bene ku babali mo, hane ba utwile cwalo, ali, Muuna yo u biza Elia.

Mi ona fo kapili yomuñwi . . . amatela, ni kunga siponji, mi a si cupwa mwa vinega, mi ba si tatela kwa lutaka, mi ba mu fa kuli anwe.

Ba bañwi bali, Tuhela, halu boneñi haiba Elia wa taha kuto mu pilisa.

Jesu, hana sa huwile ka linzwi le lituna, a felelwa ki moya.

Mi, amubone, lisila la mwa tempele la pazuha fahali kuzwa kwa halimu kufitafafasi; mi lifasi la zikinyeha, ni macwe a pazauha;

. . . mabita a kwaluha; mi litupu zeñata za babane ba lobezi za zuha,

Mi ba zwa mwa mabita kasumulaho wa zuho ya hae, mi ba kena mwa munzi o kenile, ba iponahaza ku babañata.

Mi cwale nduna wa masole baba mwanda, ni babane bali ni yena, banze ba talimile Jesu, ba bona zikinyeho ya lifasi, ni lika zene ezahalile zani, ba saba hahulu, bali, Kaniti yo neli Mwana Mulimu.

33 Halu inamiseni litho za luna fa nako nyana fela kwa tapelo.

34 Mulena, luziba kuli Wena u Mulimu. Mi ki . . . Kasumulaho wa kubala Linzwi le likenile mi la butokwa le, lukona kubona kuli sibupeho sa Hao ha si sika cinca. Wena kamita u Mulimu. Mi ku bonahala kuli Jesu na si ke aba ni tuso kaufela, kuli Na swelwi ka mazoho a fosahalile ni ku pazulwa mwa liemba, ni ku mu kwelaka mati, ni ku somiwa, ni ku pahekwa fa sifapahano, inza lota mali, kushwa. Mi kwa bonahala kuli nekusina tuso, kai ni kai, kufitela mane Ha lila, yena Kasibili, “Mulimu wa Ka, Mulimu wa Ka, kiñi ha U Ni tuhelezi?”

35 Kono, Wena u ezanga lika mwa nako ye kusina ze ezahala. Lu filwe kuziba, Mulena, kuli haiba luna ni linuka kaufela ze lu sa koni kusila, haiba luna ni malundu kaufela e lu sa koni kupahama, Mulimu u zibahala ka kuezwa lika zeo babañwi habakoni kuezwa.

36 Wena u caziba, wa musebezi, kakuli Wena wa ziba libaka la lizazi lani fa Kalvari. Wena, kakuba Mulimu, yena Ya sa shwi, no zibile kuli hola ye ilukela kutaha. Kono ha ne ku talelelizwe, ki ha No bonisize kuli No li Mulimu. No bonisize kuli noli Wena nduna. No nyungile lifasi, mi baba kenile bane ba lobezi mwa liluli ba zuha. No u nsufalize lizazi mwa busihu, sina lififi la busihu, ku bonisa kuli No li Mulimu. Kono No bonahalile kukuza fa nako yetelele.

37 Ni luna, kuzwa fa, lube ni taba ye cwana, kuli, haibile fela lu zamaya mwa Moya, lunze lu zamaiswa ka lizoho la Mulimu, hakuna taba ka ze bonahala kufosahala, niteni lu talimana ni Kalvari; Mulimu uka bulela mwa hola ye lukela, ka nako ye lukile.

38 Cwale, Mulimu Ndate, lu kupa swalelo ya libi za luna ni ku fosa kwa luna. Lu kupa Moya wa Hao ku lu etelele. Lu etelele, sina Nkwilimba hane i etelezi Ngunyana. Lube baba utwela kwa lika kaufela ze kona ku lu tahela, ka kuziba cwana, kuli Mulimu ubeleka lika kaufela hande, mi uziba kuli li ka ba hande.

³⁹ Ube ni luna kacenu mwa sebelezo ye. Lu lapela kuli Uka pilisa babali mwa buino bwa kupiliswa, mi ba bata puluso. Utaze bani ka Bupilo Bobusafeli, ba bata lika ze cwalo. Lu lapela kuli U folise baba kula ni baba zielehile, baba tile, kuto bata foliso. Mi lu ka Ku lumba ka zona. Lwa li kupa ka Libizo la Mwana Hao, Mupulusi wa luna, Jesu Kreste. Amen.

⁴⁰ Cwale, mwa ngambolo ya kakusasana cwana, lu tabela ku mi hohela kwa palo ye Ni ketile kuli ni bulele ka yona: *Zazi Lani Fa Kalvari*.

⁴¹ Ku bonahala inge ikona kuba mwaha usili; se si lukela kuba la Bufaifi Lelinde. Kalvari ilukela ku hupulwa zazi ni zazi. Mi lu utwile zeñata hahulu ka yona, lu balile zeñata hahulu ka yona. Bakutazi ba kutalize ka yona, kuzwa kwa makalelo a nako. Baopela ba opezi ka yona, mwahala masika. Bapolofita ba bulezi kale ka yona, myaha ye likiti zene isika ezahala kale. Ni bapolofita ba lizazi le ne ba supelize ku yona hane iezahalile. Ki lizazi le li butokwa luli! Ki leliñwi la mazazi a butokwa hahulu mwahala mazazi ao Mulimu akile a pazuleliseza liseli fa lifasi.

⁴² Mi haiba ki la butokwa cwalo kwa lusika lwa batu, Kalvari, Ni sepa ki kwa butokwa kuli lu kutele teni lu batisise, kubona fela seo li talusa ku luna. Kakuli, Na sepa, ka hola ya maungulo ye lupila ku yona ye, lu bata butokwa kaufela bwa Mulimu bo lukona ku ziba. Ni zeo kaufela lukona ku batisisa, lu kwanu kuli lu to ituta ka zona, kubona zeli za luna, ni seo Mulimu a lu ezelize, ni kubona seo A sepisize ku lu ezeza. Mi sani kona se lu tahela kwa kekeke. Kona libaka mukutazi ha kutaza, kona ha balanga ni ku kengeyela fa Mañolo, ni kubata susumezo, kakuli ki mutanga wa nyangela ni ndopu kwa sicaba sa Mulimu. Mi ulika kufumana sesiñwi sesikona ku. . . seo Mulimu uka bulela kwa sicaba sa Hae, sesiñwi se si kona kuba tusa. Mwendu, ikona kuba, ku ba nyaza ka libi za bona, kono ikona kuba tuso ku ba cimbula ku ba nanula, kuli ba kone ku tokolomoha libi za bona ni kuhula kwa ku sebeleza Mulena. Mi bakutazi ba lukela kubata lika ze.

⁴³ Mi lizazi le, kakuba la butokwa hahulu cwana, leliñwi la mazazi a matuna hahulu, ha lu talimeñi fa litaba zetalu ze shutana zeo lizazi lani litalusa ku luna. Ne luka nga mianda anda. Kono, kakusasana cwana, Ni ketile fela litaba zetalu ze shutana, za butokwa ze lu bata ku bulela fateni, mwa mizuzu ye likani yetatama, zeo Kalvari italusa ku luna. Mi Ni lapela kuli zani lika nyaza muezalibi kaufela ya liteni mo; li ka eza mulapeli kaufela kuya fa mañwele a hae; lika eza mutu ya kula kaufela kuhulisa tumelo ya hae ku Mulimu, ni ku zamaya kuikela, inza folile; muezalibi kaufela, kupiliswa; ya wile kaufela kukuta, mi a ikutwe maswabi iliyena; mi mulapeli kamukana, awabelwe, mi aswale sinca ni kuswala sepo yenca.

44 Taba iliñwi tuna, ya butokwa yeo Kalvari italusa ku luna ni lifasi, kikuli, ne i felize puzo ya sibi, hañwi kufeleleza. Mutu na fumanwi ana ni mulatu wa sibi. Mi sibi neli mulatu o mutu na sa koni kulifa. Mulatu neli o mutuna hahulu kuli mane nekusina nahaiba ya na kona kulifa mulatu. Ni lumela kaniti kuli Mulimu utomile ona cwalo ka nzila yani, kuli mulatu no kaba o mutuna hahulu kuli kusike kwaba mutu ya na kona ku u lifa, kuli Yena aeze cwalo, Kasibili. Cwale, tifo ya sibi neli lifu. Mi luna kaufela ne lu pepezwi mwa sibi, ku bupiya mwa bumaswe, lutile mwa lifasi, lunze lubulela buhata. Kabakaleo nekusina ni alimuñwi wa luna ya na swanela, kamba, ne ba si ka fumana ni yomukana mwa lifasi yana swanela.

45 Mi sibi ne si si ka kalela mwa lifasi. Sibi ne si kalezi mwa Lihalimu. Lusi- . . . nali . . . Lusifa, yena diabulosi, neli sibupiya se si nyazizwe, ka kusa utwela kwa hae, a si ka to nata kale fa lifasi. Sibi ne si kalezi mwa Lihalimu, kona ko Mulimu na beile Mangeloi, ni zeñwi cwalo, fa mayemo aswana a Na beile mutu ku ona; zibo, kota ya zibo, kota ya Bupilo ni kota ya zibo, koo mutu na lukela kuba ni buiketelo bwa hae. Mi cwale Lusifa ha na filwe tukuluho, ya kupanga buiketelo bwa hae, na batile sika sesinde kufita seo Mulimu na nani. Sani kona se ne si kalile butata.

46 Mi ne ku nani sene si tokwahala ka sibi. Sene si tokwahala neli lifu. Lifu neli yona tifo. Mi, sani kikuli, ne lu kaya mwa butungi bwa litaba ze, kakuli ha Ni lumeli kuli kuna ni sika kwanda lifu lililiñwi. Kuna ni Bupilo bulibuñwi. Mi Ni lumela kuli mutu ya nani Bupilo Bobusafeli hakoni kushwa. Mi Ni sepa kuli kuna ni ku ciseleza kwa kufeleleza kwa moyo wani o eza sibi, kakuli Bibebe ibulezi kuli, “Moyo o eza sibi, u ka shwa luli.” Isiñi mutu; “kono *moyo* o eza sibi.” Kacwalo, Satani ulukela kushwa luli, kuli asinyiwe ka kufelelela luli. Mo Ni sa lumelani ni lingambolo za kuli Satani uka piliswa! Na ezize sibi, mi ki yena mutateki wa sibi. Mi moyo wa hae no ezize sibi; mi nali moya. Moya wani kaniti uka sinyiwa luli, ko kutokwa ni se si ka siyala fateni.

47 Mi fani sibi ha ne si natile mwa lifasi, kwa mulaho kwa simuluho, sina lisila lelinsu le li wile kwa lihalimu, ne sitilo fenyata mata a lifasi. Ne si kashelize sibupiya kaufela, fa lifasi, ni pupo ya Mulimu kaufela, mwa tamo. Mutu nali mwatasa tamo ya lifu, matuku, matata, maswabi. Libupiya kaufela ne liwile ka sona. Sibi neli mulyani wo no kenyize singonyi mwa lifasi. Mi cwale se lu beiwa teni mo, lu sina sepo, kakuli sibupiya kaufela fa lifasi ne si fa likute ku sona. Mi kaufela ya na pepwa mwa lifasi na fa likute ku sona.

48 Kacwalo, ne si zwile kwa Sibaka kone ku sina sibi. Ne si sika kalela mwa lifasi. Yomuñwi wa luna na sa koni ku liulula mulikana hae. Ne sina ni kuzwa ku Yomuñwi.

⁴⁹ Kabakaleo, cwale mutu hana lemuhiye kuli u kauhani ni Mulimu wa hae, atoba muyambaeli. Ba bokolola. Ba lila. Neba katazehile. Ba yambaela kwa ni kwa, mwahala malundu ni mwahala mahalaupa, banze ba bata Munzi o muyahi ni mupangi wa ona ki Mulimu. Kakuli, na zibile kuli ha na ka kuta fa pila Pata ya Mulimu, na ka bulela lika kaufela ni Yena. Kono nekusina nzila ya kukuta ka yona. Na tilo lateha. Na sa zibi nzila ya ku kuta ka yona, kacwalo na ti lo ikela fela, ni ku yambaela, kulika kufumana kokuñwi kwa na ka fumana nzila ya kukutela kwa Sibaka sani. Sesiñwi mwahali ku yena ne si mu bulelezi kuli na zwile kwa—kwa Sibaka se ne si petehile. Hakuna mutu mwahala sicaba se siliteni, kakusasana cwana, kamba mwahala sicaba fa tepu ya silimba, ko li kaya mwahala lifasi, hakuna ni yomukana mo, kamba kai kaufela, konji a lakaze kupetahala kwani.

⁵⁰ Mulife likoloti za mina, munahana kuli, “Yani uka li lifa.” Ha mu se mulifile likoloti za mina, konakuli kuba ni ya kula mwa lubasi lwa mina. Mi butuku ha bu se bu folile, konakuli muba ni likoloti zeñata za kulifa. Taba yapili mwa ziba, milili ya mina ya fetuha limbi, mi mu bata kukutela kwa kuba yo munca. Mi kuna ni sesiñwi nako kaufela, ka tundamo, mi ki ka bakeñisa ona buino bwa sibi bwani. Kono mwa pilu ya mina, kakuli ha munahana ze cwalo, ku bonisa kuli kuna ni Kupetahala kokuñwi. Kusili, kuna ni sesiñwi.

⁵¹ Lani kona libaka, linako zeñata, kacenu, zeo muezalibi ha sa yembana. Musizana yomunyinyani, yomunde ha ka kuta manyeze a milili ya hae, kuli abe sina babañwi; ku ipenta kwa sifateho sa hae, kuli abonahale hande; ku apala liapalo ze bonahalisa mufuta wa sibupeho sa hae. Kakuli, kona sika sinosi feela sa kona kufumana, kufumana sibaka kokuñwi ko akona kufumana sesiñwi sa kukutela ku yena, kuli baana ba mu lizeze miloli, ku mu kobeta, ku bapala ni yena. Mutanga yomunyinyani uka eza lika zeswana ku musali, kulika kuikeza ili yena ku ebelisa ku yena. Babali mabapa ba ka yaha ndu, ni ku beya mwa mukwa omuñwi, kakuli ika bonahala bunde nyana kufita sibaka sa ya bapani ni yona. Kikuli linako kaufela, lu sweli ku batanga sika sesiñwi, mi sesiñwi si zwelapili kuya si pahama fa halimwa sesiñwi. Musizana uka fumana kuli musizana yomuñwi u zibahala hahulu kufita yena. Muyaha tuko uka fumana ndu ye bonahala hande kufita ya hae. Musali uka fumana musali yomuñwi ya apezi ka nzila yeñwi, ye bonahala hande kufita yena.

⁵² Ki sesiñwi mwahali ku luna, se sinze si bata sika sesiñwi, mi si bonisa kuli lu latehile. Lu batanga kufumana sika se si ka lu tiseza ku kuliswa, se si ka kulisa maikuto a tala a li mwahali ani, kono ku bonahala inge halukoni ku si fumana. Batu ba likile mwahala masika. Ne ba bokolozu ka zona. Ne ba lilile. Ne ba

ezize lika kaufela ze ba ziba mwa ku ezeza, kono niteni ne ba si ka li fumana, ba yambaela mwa lifasi.

⁵³ Ka kufeleleza, zazi leliñwi, lani kona lizazi lani la Kalvari, neku nani Ya na zwile kwa Kanya. Alimuñwi, wa Libizo la Jesu Kreste, Mwana Mulimu, Ya na zwile kwa Kanya, mi Kalvari ya pangiwa. Lani kona lizazi hane ku lifezwi tifo, mi mulatu wa sibi no felizwe kuyakuile. Mi ya kwalula nzila ya sika se lu utwela ni ku nyolelwa. Ne si tisize sibaka sa ku kuliswa. Hakuna mutu yakile apotela Kalvari, ni ku bona mo ne iinezi, ya kona kuzwelapili ya swana. Lika kaufela za kile a lakaza kamba ku shukela, li fumanwi, ha sa fitile fa sibaka sani.

⁵⁴ Neli lizazi la butokwa ni kufita, mi ili sika sa butokwa hahulu, ne li nyanganyize lifasi. Ne li nyanganyize lifasi, kufita mo li kile la nyanganyiswa fateni haisali. Fani Jesu hana shwile fa Kalvari ni kulifa mulatu wa sibi, lifasi la sibi le neli unsufezi. Lizazi ne li kile la likela mwahala musihali, ne li kubama ka kuikalelwa. Mi macwe a zikinyeha, malundu a pazauha, mi mibili ye shwile ya zwa mwa mabita.

⁵⁵ Ki sikamañi sene si ezahalile? Mulimu nakeni teni, fa Kalvari. Na holofalize folofolo yani, yebizwa Satani, kuyakuile. Cwale seli ya buhali hahulu ni kufita sa pili, kakuli ne li tisize Liseli kwa lusika lwa batu. Mi mutu kaufela wa ziba kuli folofolo ye holofezi ki ye buhali hahulu ni kufita, unza hohoba kwa ni kwa ni mukokoto o lobilwe. Cwale, Satani na pyatilwe, fa Kalvari. Lifasi ne li pakile kuli nekuli cwalo.

⁵⁶ Tifo tuna kufitisisa yekile ya lifiwa, mi yena Anosi fela ya na kona kulifa, natile ku to eza cwalo fa Kalvari. Fani kona fo ne ku lifezwi mulatu omutuna. Yani ki ilinwi ya lika za teni. Mulimu na bata ona cwalo. Hakuna mutu ya na swanela. Hakuna mutu ya na kona. Hakuna mutu ya na kona kupeta cwalo. Mi Mulimu ataha, Yena kasibili, mi na ezizwe mwa nama, mi apila bupilo bwa butu, mwatasa litakazo za butu, mi na kokotezwi fa Kalvari. Mi kwani, fani Satani ha na nahanile kuli Nasike kueza sani, Nasike kuya ka zona, Na ile mwa Getsemani ni muliko kaufela o mutu akile akena teni. Na ile ku zona sina fela batu kaufela, kono Na lifile tifo.

⁵⁷ Mi sani kona se ne si unsufalize lifasi. Ne ku swana inge singonyi, ka nako ya kupazuliwa. Cwale mualafi haafa mutu ndonga ya singonyi, pili uka mu taba yona, a si ka eza kale sika. Mi cwale Mulimu hana—hana bile ni ku pazula Keleke, lifasi ne libile ni singonyi, lifasi ne libile ni zikinyeho. Kona libaka! Mulimu, mwa nama ya butu, na shwa. Neli hola yeo batu ne ba libelela, ibo buñata bwa bona ne ba si ka ziba.

⁵⁸ Sina mo ku inezi kacenu, babañata ba libelezi lika ze, mi niteni haba li lemuhi. Haba lemuhi nzila ya kuzwa ka yona. Ba sa lika kubata minyaka ni lika za lifasi, kulika kufumana nzila yabona ya ku zwela.

59 Neku nani, lisupo ze ne supeza kwa lizazi lani, miluti yemiñata hahulu yemituna. Ne i bonahalezi mwa muluti wa ngunyana, ka lipoho, ka linkwilimba, ni lika zeñwi ze kaufela, kono niteñi ne li si ka li kona. Ne li si ka kona kuloba mata ani a lifu, koo Satani na sweli lifasi.

60 Ona macwe aswana akile a zamaya fateni, kwa ni kwa mwa lifasi, mulilo o ciseleza! Lusifa nali mwana kakusasana, mi na zamaile fa lifasi hane kutuka macwe a ciseleza. Ona macwe a swana ani anatilo bata, fani Jesu hana shwile fa Kalvari, na fasukile kuzwa mwa mubu.

61 Mulatu o no lifilwe, ni tamo ya Satani yene lobilwe. Mulimu nabeile hape mwa mazoho a mutu, nzila ya kukuta ka yona ku sa na bata. Na sa lukeli kulila hape. Kunata, fani ha Na lobile moongola wa Satani, fani fa Kalvari, moongola wa sibi, wa matuku! Mi litisa sibupiwa kaufela se si pila, fa lifasi, kukuta hape fa Pila Mulimu, ka libi ze swalezwi. Haleluya! Libi za luna liswalezwi. Hakusana mukwa hape wo Satani akona ku lu usufaza kuzwa ku Mulimu.

62 Kuna ni nzila ye kambama ye ezizwe. Kuna ni luwaile lo lufita kwani. Kuna ni muhala wa kuya kwa Kanya, otisa mutu kaufela kufita fa kuswala muhala wani. Haiba nji mutu u tezi sibi, kikuli ne si mu tomahanyize fahali. Wa kona ku swalelwa ka sibi sani. Isiñi sani fela, kono kuli sibi sani si lifilwe. Oh! Ha u lukeli kubulela kuli, “Ha ni swaneli.” Luli, u swaneli, ha ukoni kuba cwalo. Kono yena Yana swanela nangile sibaka sa hao. U lukuluhile. Ha ulukeli ku bilaela ni hanyinyani. Ha ulukeli kuba mutu ya bata bata munyaka fa lifasi fa.

Kakuli kuna ni siliba sesitezi Mali,
Azwa mwa misinga ya Emanuele,
Mi baezalibi haba nwela mwatasa muunda
wani,
Ba tamuluha kwa maikuto a ku fosa.

63 Ha ulukeli ku ba ya lateha. Kuna ni nzila ye kambama, ki Nzila, mi i bizwa Nzila ya kukena. Ya si kakena ha zamai ku yona. Kakuli, utaha mwa liweluwelu, pili, mi kipeto ukena mwa nzila ye kambama.

64 Na lobile mata a Satani. Na lobile likwalo za tolongo ya lihele, ku mutu kaufela ya na kwalezwi, mwa lifasi le, mwa litolongo, ka kusaba kuli ha na shwile, seo lifu ne likaba ku yena. Fa Kalvari, Na kwaluzi minyako ya tolongo yani, ku lukulula muzike kaufela kuya inza tamuluhile. Ha ulukeli ku pazulwa ki sibi ni hanyinyani. Ha ulukeli ni hanyinyani kubeya lilama za hao kwa sibi, kunwa, kuzuba, kulaula, kubulela buhata. Wa kona ku sepahala, kuluka, ni kuiketa. Mi Satani hakuna sa kona kueza ka sona, kakuli u sweli kwa muhala, ki muhala wa Bupilo o sweli mwa Licwe la Myaha-myaha. Hakuna se si kona kuku nyanganyisa ku Sona. Hakuna mañungwa akona kuku

nyanganyisa ku Sona. Hakuna sika, mane kutokwa nihaiba lifu kasibili, halikoni ku lu kauhanya ni lilato la Mulimu lelili ku Kreste Jesu. Sani kona seo Kalvari italusa.

⁶⁵ Batu bene bali mwa litamo ne ba lukuluhile. Batu bene bali nako yeñwi mwatasa sabo ya lifu ha ba sa saba lifu ni hanyinyani. Mutu ya bata Munzi, wo muyahi ni mubupi, Mulimu, wa kona kuhata mwa nzila ye kambama, ni kutalimisa pata ya hae kwa Lihalimu, kakuli u lukuluhile. Haleluya! U liuluzwi. Ha lukeli ku yembana ni hanyinyani, kakuli kuna ni mukwa wa kuziba haiba ulukile kamba nee. Mulimu wa fa Bupilo. Libi za luna liile. Zazi lani fa Kalvari na lifile mulatu. Ha lu bona kaufela zani, ki kabakaleo muloki naize:

Mwa nako ya ku pazauha kwa macwe ni
 lihalimu lelinsu
 Mupulusi waka ainamisa toho ya Hae mi
 ashwa.
 Lisila lene likwaluhile la patulula Nzila
 Ya tabo ya Lihalimu ni lizazi lelisafeli.

⁶⁶ Abrahama na sa lukeli ku yembana ni hanyinyani, mwahala naha, inza bata munzi. Muezalibi halukeli ku icambaela ni hanyinyani, kamba wa kona kupiliswa kamba kutokwa. Mutu ya kula halukeli kubilaela kamba kulik uka fola kamba kutokwa. Lisila lene likwaluhile, ka lizazi lani fa Kalvari, ne li patuluzi Nzila ye ya kwa tulo yetezi. Mulimu alufe mata a Moya wa Hae, kuli lupile ka kukoma ona lika ze kaufela; ulu kupa kuli lu lumele. Zani kona ze ne ezahalile ka zazi lani fa Kalvari. Ne ku sikaba lizazi leliñwi hape sina lona. Hakuna kuba lizazi leliñwi hape sina lona. Ha kusana tuso ni hanyinyani. Mulatu u lifilwe, mi lu liuluzwi. Buitumelo bu be ku Mulimu! Lu liuluzwi. Hakusana lika ze mu lukela kubilaela hape. Hakusana kunuha sika hape ka lona. Lika kaufela liingilwe kale. Lisila ne li kwaluzi siapalo, mi lu tomilwe fa nzila ye kambama, hakusana ku bilalela hape, kono ki kulumela ni kuzwelapili fela ku zamaya. Luya fa Pila Mulimu kasibili.

⁶⁷ Abrahama na zibile, ni babañwi ne ba zibile, kuli hane ba sweli kubata Munzi wani, ne ba ziba kuli ne bazwa Kokuñwi. Sesiñwi ne si ezahalile. Ne ba pila mwa lifasi leli na ni luñañali. Zikinyeho ya taha. Mandinda ataha. Lindwa ni lipulao! Sitongwani ni ngu ne li fula hamoho, kamba sitongwani ne si cile ngu, mi tau se ica komu. Ha ku bonahali hande. Kuna ni se si fosahalile. Na zibile kuli kuna ni sene si fosahalile. Baana ni mizwale ba bulaya muzwale wa habo; ndate u bulaya mwana mucaha, mwana mucaha u bulaya ndatahe. Kuna ni sesi fosahalile. Usweli ku supala. Wa shwa. Usweli kuya inza fokola. Butuku buinzi ku yena. Umwa litamo. Likota za hula, kono ha ki ze sa shwi. Za shwa. Malundu a cinca. Linuka za kalanga. Mezi a omanga. Kuna ni se si fosahalile. Mi a bata sibaka, Munzi ko ne ku si ke ku ezahala zani ni hanyinyani. Na zibile, haiba na ka

kuta fela fa Pila ya Na li ezize ka kuluka, na ka ikambota kufeza litaba ni Yena.

⁶⁸ Oh, ki lithonolo cwani, muezalibi, ku cwalo, kakusasana cwana, ka kuziba kuli muna ni Nzila cwale. Zazi lani fa Kalvari ne li kwaluzi nzila. Kakuli lika kaufela zene ba bata bashemi, Kalvari ne i mi file sona, mahala. Mu ka lihana cwani? Mu ka lihana cwani, kuli mukene mwa kopano? Mu ka lihana cwani, kuyolisa sika ka yona, minyaka ya lifasi? Ki kabakalañi hamusike ku i amuhela? Lisila le likwaluhile litisa mutu kukutela fa pila Pata ya Mulimu, asina sibi ku yena, sa mufuta kaufela. Mi abeya nzila fa pila hae, kwa sika sa sweli kubata: Lihalimu, kanya, kozo, Bupilo Bobusafeli, lika kaufela fa pila hae.

⁶⁹ Zazi lani neli—neli kunatiwa kwa mata a Satani. Ne lifelize lika kaufela.

⁷⁰ Mi Na kona ku Mu bona fani; Nali ngunyana ya mwa Edeni, kuzwa mwa muluti wa pili luli o no tile ka yona.

⁷¹ Fani Abele, ka tumelo, na file ku Mulimu sitabelo se si kateleha kufita Kaine, mwendi na tamile sisansa—sisansa sa veine mwa mulala wa ngunyana, ku i hohela fa licwe. Kunga—kunga licwe mwa lizoho la hae, kuba muwayo, ni kubondolola toho ya yona ye nyinyani kwa mulaho, ni ku i puma kufitela i shwa. Mi boya bwa yona atala fela mali ayona. Ya nyakaula mwa mali a yona. Neli muluti.

⁷² Kono ka zazi lani fa Kalvari, ne kusina ngunyana ya lifasi le, kono neli Ngunyana ya Mulimu, ye ne shwa, inze i nyakaula mwa Mali a Yona Kasibili. Na sehakilwe, ni ku lemakiwa, ni ku natiwa, ni ku kwelakiwa mati, ni kubakulwa, ni ku lindaulwa, ni zeñwi kaufela, ka lifasi, mi Mali a ngonga kwa milili ya Hae.

⁷³ Fani ngunyana ya Abele hane i shwile, ne i shwa, inze ibulela mwa mushobo wa na sa utwisisi Abele. Ne isweli kukowana.

⁷⁴ Mi ni Ngunyana ya Mulimu hane i shwile zazi lani fa Kalvari, Na bulezi mwa mushobo wa kuli hakuna ya na Mu utwisisa. “Mulimu Waka, Mulimu Waka, kiñi ha U Ni tuhelezi?” Neli Ngunyana ya Mulimu, ye ne sehakilwe mwa liembaemba, ku lemakiwa.

⁷⁵ Nali yena Ngunyana luli yo Abele na hupula mwa munahano wa hae, fani hana boni Peu ya sepiso ya musali. Nali yena Ngunyana ya na boni Daniele, ya na bu laezwi fa lilundu, kusina mazoho. Nali yena Liwili mwahala liwili, ku mupolofita. Kaufela ze ne ba boni kale neli tahile ka lizazi lani, zazi lani fa Kalvari. Sani ne si tisize taba yetuna. Lani ne li lobile mukokoto wa Satani.

⁷⁶ Pili, lu lukela kubata seo lizazi lani ne litalusa. Sa bubeli, lu lukela kubona seo lizazi lani li lu ezelize, cwale, sene li lu ezelize.

Cwale, sa bulalu, ha lu boneñi se lu swanela ku ezeza lizazi lani. Se lu lukela kueza?

⁷⁷ Pili, lu lukela kotalima ku lona, kakuli ki lizazi le lituna, lelituna kufitisisa mwa mazazi kaufela. Mulatu ya sibi no lifilwe. Mata a Satani na lobilwe.

⁷⁸ Mi cwale lu bata kubona se lu swanezi kueza ka lona. Cwale, ka ku kutisa sesiñwi ku lona, fani Jesu hana shwile fa Kalvari, fa Kalvari zazi lani, Na si ka lifa fela tifo ya libi za luna, kono hape Na lifile tifo ni ku lukisa nzila kuli lu Mu latelele; kakuli luna, kakuba bo Adama baba wile baba liuluzwi. Sina Moya mo ne u etelezi Adama (Adama wa pili) ka Moya, yana nani tamaiso fa libupiwa kaufela, konakuli luna (Adama wa bubeli), kamba baana ba lifasi lu liuluzwi ka Kreste, kuzwa ka lizazi la Kalvari, lwa kona ku Mu latelela. Cwale, fani ha Na shwile fa Kalvari, Na pangile nzila. Na felezwi ki Moya, ona Moya o Kenile, Wani ono lumezwi kukuta mwa lifasi, kuli wena ni Na lupile ka ona. Sani kona seo Kalvari italusa ku luna, ku Mu latelela.

⁷⁹ Pili, lu talime ku lona, lubone sene li lu ezelize. Mi cwale ki sikamañi se lu swanezi kueza ka ku likuteka? Ki sikamañi seo wena ni Na lu lukela kueza?

⁸⁰ Cwale, lubulela kuli, “Kihande, Na—Na itumela ka sani. Sani ki sesinde hahulu.” Kono lu lukela ku li amuhela. Mi ku li amuhela, ki ku amuhela Mutu wa Hae, Kreste mwa lipilu za luna.

⁸¹ Mi, lu lukuluhile kwa sibi, kabakaleo cwale hakusana litamo za sibi ze lu hanelela, ni hanyinyani. Mulimu, mane inge lu samba kuba lu eze sibi, Sitabelo se si petehile si lu petahalize. Kakuli, Jesu naize, “Mu be baba petehile, sina Ndata mina mwa Lihalimu hali ta petehile.” Cwale, hakusana ze lukela ku ezahala hape, kono lu beilwe baba petehile fa Pila Mulimu.

⁸² Cwale, fani kona fo lu latehezwi ki sibaka sa luna. Haiba ha lu tokomeli, lu lika kotalima kwa mulaho ku se ne luli sona. Mi haibile fela lu talima kwa mulaho ku sene lu banga sona, konakuli Sitabelo ha si talusi sesiñwi ku luna. Oh, kana ha mu boni cwalo, keleke? [Puteho ili, “Amen.”—Mu.] Ne nisike ku. . . Ne nisike kulika musebezi. Hani koni, mi ni mina hamukoni. Hakuna mukwa wa kulika ka ona. Mu latehile, ka kukala, ibile fela utalima ku so ezize. Kono usike wa talima ku so ezize.

⁸³ Talima ku sene li ku ezelize lizazi lani fa Kalvari. Ne li lifile tifo ya hao. Ne li felize mulatu. “Libi za mina ni ha likaba ze fubelu; ki ze sweu sina litwa. Li fubele sina lizuku; ze sweu sina boya bwa ngu.” Konakuli hamusana sibi. Hamuna sibi ni hanyinyani mu petehile. Hakuna taba ka se muezize, kamba se mueza, mu sali baba sina sibi. Ibile fela mu amuhezi Jesu Kreste kuba Mupulusi wa mina, libi za mina li swalezwi. Sika kaufela se si *swalezwi* si “takuzwi ni kulibalwa.”

⁸⁴ Konakuli si eza sikamañi? Si mi fa, kuya ka buino bwani, Moya wa Hae, kuli mu Mu latelele, ni kueza sina mwa Na ezelize, ku babañwi ba basweli ku latelela. Yena nali fela Mutu alimuñwi, ali Muuna ya petehile. Na file bupilo bwa Hae, mi Na mi ezelize mutala. Cwale ki sikamañi se lu swanezi kueza?

⁸⁵ Cwale, sika sapili se Ni bata ku bulela, kikuli, Jesu na si ka ipilela Iliyena muñi. Bupilo bwa Hae ne bu sinyehela ku babañwi. Fani kikuli, kupetahala, neli Bupilo Bobusafeli. Ha ubulela kuli wa yanga kwa keleke, mi ueza lika zende, sani si lukile. Kono haiba uipilela bupilo bwa hao unosi, hauna Bupilo Bobusafeli. Bupilo Bobusafeli, ki kupilela babañwi. Ne bu bonahalile hane Butile ku Ngunyana ya Mulimu. Na pilile, mi nabile ni Bupilo Bobusafeli, kakuli Na sika ipilela Iliyena. Na pilezi babañwi. Mi mu amuhela Bupilo Bobusafeli, ka kuamuhela lizazi lani, mi ha mu sa ipilela mina bañi mu nosi ni hanyinyani. Mu pilela babañwi.

⁸⁶ Yomuñwi naize, “Ukona cwani kuyema, mane mutu akubize mabizo a maswe kaufela?” Ha uipileli ili wena unosi. Upilela babañwi, kuli ukone kuliulula mutu yani. Mu fetuha kuba bana. Mi butata bwatene ki kuli, keleke ilibezi kuli ki bana. Uba mwana. Unga sibaka sa Kreste. U mwana, konakuli usike wa ipilela ili wena unosi. Upilele babañwi.

⁸⁷ “Kihande, Muzwale Branham, Ni pilela muzwale *yo*, kakuli kaniti yena ki muuna yomunde.” Ha ki cwalo.

⁸⁸ Pilela mutu yani ya ku toile. Upilele mutu yani ya na ka ku bulaya haiba wa kona. Sani kona se ne ba ezize ku Yena. Ne ba Mu bulaile, mi A shwa, kuli Akone ku ba pilisa. Bwani kona Bupilo Bobusafeli. Mi, wena, sesili mwa sifuba sa hao, fo ne kipeto ulibile Lihalimu. Kono ufane lika za hao luli, u itobohe zona, sina ngu mo itobohela boya bwa yona. Wa itibala, mi ulibe Kalvari.

⁸⁹ Na sepa se sa mitusa kuli mube mwa sibaka. Sani kona seo tabernakele, sani kona seo batu kaufela, bana ni kueza, ki kufumana seo muli sona, ni libaka. Keleke, ha ki kuya kwa keleke ku yo liza lipina, kuopela lipina. Keleke ki sibaka koo sikuluho. “Katulo ikalela mwa ndu ya Mulimu.”

⁹⁰ “Lu swanezi kuipala kuba baba shwile, ni kupilela Kreste.” Mi, Na ezize nzila kuli lu kone kuipa kwa sebelezo ya Hae, ku Mu latelela. Haiba lu Mu latelela, lu pila bupilo bwa Na pilile. Sani ki sesinde.

⁹¹ Jesu naize, mi na ambozi ka sona. Ni mife fela ze ñozwi nyana ku zona. Muteezele hande. Musike mwa li mbunja. Jesu naize, ka Lizazi lani Uka kauhanya batu, sina lingu ni lipuli. Mi Ukali kwa lipuli, “Muyeme kwa neku la nzohoto.” Mi kwa lingu ukali, “Muyeme kwa neku la silyo.”

⁹² Mi Ali kwa lipuli, “Muzwe ku Na. Kakuli, Ne ni lapile, mi ne mu si ka Ni fepa. Nenili mwa tolongo, mi ne mu si ka Ni lekula.

Ne nili mapunu, mi ne mu si ka Ni tinisa. Ne ni shwile linyolwa, mi ne mu si ka Ni fa sa kunwa. Ne ni kula, mi ne mu si ka Ni potela. Kacwalo, amuzwe ku Na.”

⁹³ Mi kwa lingu, Ki hali, “Ne ni lapile, mi ne mu Ni fepile. Ne nili mapunu, mi ne mu Ni file liapalo. Ne ni kula, mi mwa Ni lekula.”

⁹⁴ Mi mulemuhe. Musike mwa palelwa kuutwa, keleke. Mu buluke seo mwa lipilu za mina, kamita. Li tahisizwe ka ku sa fumba! Batu ha ba ezangi ka kuba musebezi. Mutu ya fa sika ku yomuñwi, kakuli ulukela kueza cwalo, mutu ya kufepa kakuli ulukela kueza cwalo, una ni maikuto a bu lyangelino. Ilukela kuba ona bupilo bwa hao luli, likezo za hao tota.

⁹⁵ Neli ku komokisa kokutuna hahulu kwa lingu ze, kuli ne liize, “Mulena, ki lili fo ne Ubezi ni tala? Mi ne lu sika Ku fepa. . . Ki lili fo ne Ubezi ni tala, mi lwa Ku fepa? Ki lili ha No li mapunu, mi lwa Ku fa liapalo? Ki lili ha Nobile ni linyolwa, mi lwa Ku fa sa kunwa? Ki lili ha No kula, mi lwa Ku lekula?”

⁹⁶ Neli fela ka kuzwa mwa lilato, neli Bupilo bwa Hao fela bone bupile ku bona. Mulimu, lumeleza kuli sicaba sibone seo Kalvari ne i lu ezelize, ka ku lukuluha fela.

“Ki lili ha No li cwalo, Mulena? Lu samba kuba lu zibe sani.”

⁹⁷ Mutalime satilo bulela Jesu kuli, “Ona mo ne muezelize ku bao, ne mu ezelize Na.”

⁹⁸ Bupilo bobusina buitati; isiñi muhupulo wa bubeli. Isiñi ku nahana ka zona; kono mu shwile luli kwa lika za lifasi, mi mwa pila luli ku Kreste, ni ku zamaya mwa nzila ya kambama, kuli lika ze ki lika fela ze i tahela ili zona. Mueze fela. Ha ki kubulela, “Kulukile, cwale, haiba Mulena, Mulena, ubata kuli ni eze sani.” Ha ki cwalo. Mu siemba sa Hae fela. Moya wa Hae u kumina, mi mueza ka mukwa wa Na ezize. Ah! Mwa utwa kana.

⁹⁹ “Kuna ni nzila ye bonahala kuluka ku mutu, kono mafelelezo a yona ki nzila ya lifu.”

¹⁰⁰ “Haki mutu kaufela yali, ‘Mulena, Mulena,’ ya ka yo kena, kono ki bao fela baba eza tato Ya Ndate,” kuzwa fela mwa lipilu za bona, ka ku lukuluha.

¹⁰¹ Cwale, zazi lani fa Kalvari ne li lifile tifo yani, kacwalo lwa kona kuba ka nzila yani.

¹⁰² Haki kubulela kuli, “Mwa ziba, mbelwa Jones nako yeñwi nali. . . Na felezwi ki malasha, mi Ne niile ku yo mulekela malasha. Na ku bulelela, Ne ni boni muzwale yana tokwa suti ya liapalo, mi se Ni yo mu lekela suti ya liapalo. Kulumbwe Mulimu! Ni Mukreste.” Oh, mawi! Wena muitati, ya shebile, mutu ya zielehile. U muipi.

¹⁰³ “Usike wa tuhela lizoho la silyo ku ziba se li eza la nzohoto, mi ni la nzohoto lizibe se lieza la silyo.” Ki kushwa fela ku Kreste,

kufitela mu eza cwalo, nihakulicwalo. Ki sibupeho sa hao. Ki sibupeho sa buino bwa hao. Wa eza cwalo, nihakulicwalo. Ki Bupilo fela bo bu pila ku wena. U ipile ka kutala kwa Moya wani, mi Ona wa pila Isali ona fela mwahali ku wena. Oh, u i kutwa Moya o fuyozwi wani, Bupilo bwani! “Haki na ya pila,” ki Paulusi yoo, “kono Kreste ki yena yapila ku na,” ka kulata feela.

104 “Kulukile, Na ku bulelela, Muzwale Branham, lu Bakreste fa. Lutusa sicaba *se*. Lutusa batu *bani*.” Oh, mawi! Maswabisa ku wena. Bwani ha ki Bukreste.

105 Bukreste ka kulata fela bu na ni kueza sika. Si na ni ku ezahala. Mi u libale fela za kuli, kaufela zani, “Ha kina.” Zamaya, u si eze.

106 Kreste na file fela bupilo bwa Hae ka kutala ku Mulimu. Na ipile Iliyena, kakuba mutanga wa silundwamanje, kwa sicaba. Na file bupilo bwa Hae, mahala fela. Na sa lukeli kueza cwalo. Na si ka eza cwalo ka lunya. Na si ka bulelela kuli, “Cwale, mizwale, mina kaufela mu swanezi ku hupula hahulu ka Na, kakuli Ni tezi ku to mi shwela.” Na si ka bulelela linzwi ka sona. Na shwile, nihakulicwalo, kakuli neli Mulimu ku Yena.

107 Ki Mulimu ku mina, ki Mulimu ku na, ya lu eza kuli lu talime ku babañwi. Lingu, kwa neku leliñwi.

108 Yomuñwi wa kubona ukali, “Kihande, Mulena, Ni ezize *sakuli*. Mi, Mulena, Ni ezize *sani*.”

109 Na ize, “Muzwe ku Na, mina baezi ba ze maswe. Nali kuba ni mi zibe.”

110 Kambe keleke neika fita fa likalulo za niti zani, kuli ha ki sika se mulika kueza, mu tundanisa ili mina kuli mu si eze. Ki sesiñwi se si pepilwe mwahali ku mina.

111 Ni swalele, mulikana ka wa Pentekota. Nu mu pentekota. Kono balikani baka ba ma Pentekota bana ni litiba, ko balukela kuba ni—ni lipina za ku akufisa, kuliza milupa yeñwi, kamba ku kambela mazoho, kamba tumbuli, kuli babe ni lilata. Ani ki maikuto feela. Baliza mwa likwata za baopela ba sika ya kale kwa ndwa. Ba kenya batu maikuto a ndwa. Na lumela mwa lipina. Na lumela mwa kukambela mazoho. Kono Na lumela mwa lika ze. Yani kona niti luli. Lu swanela kuba ni zona zani.

112 Kono mu siile lika zetuna li si ka ezahala kale, bwani kona bupilo bwa kuipa boo Mulimu ya pila ku mina, bu eza se si lukile kusina ku tundana kakuli si lukile. Ka kuzwelapili fela, musike mwa nahana sesiñwi ka sona. Mupile fela ona cwalo. Mi mutokomele, mwa bona se si sweli ku ezahala. Fela mueze. . . ha mulukeli. . . Mu nzila ye kambama. Sani kona sene italusa Kalvari ku mina, mwa nzila ye kambama, na i kwaluzi zazi lani ka mina.

113 Cwale, cwale muhupule, hamukoni kuba siemba ki puli mi siemba ki ngu. Halina ku kopana.

¹¹⁴ Cwale, kuna ni batu babañata babali, “Eeni, mwa ziba kana? Luna ni katengo mwa sikwata sa luna. Luna, lwa tisanga ba botana. Lu eza *sakuli*.” Zani li lukile, kono musweli kuliza pala ka zona. Ha mulukeli kueza cwalo.

¹¹⁵ “Mufange limpo za mina mwa mukunda,” Jesu abulela. Ka ku i kezahalela fela, sesiñwi ku mina, kufita kuya, ku yo nga mezi. Muna ni linyolwa. Haiba mutu ya tatama una ni linyolwa, mu nahane ka yena, hape. Mutu ya tatama utokwile, mu nahane ka yena ka mukwa o swana mo ne mu ka ezeza ku za mina. Mi ha muisezi ngana kwateni. Muzwelepili fela kuikinela.

Cwale, haukoni kuba licika ki ngu mi licika puli.

¹¹⁶ Kacwalo haiba uli, “Kihande, keleke ya luna ina ni katengo. Lwa fanga ba botana, mi lu ezanga *se*, ni *sani*, ni kueza *sesiñwi*.”

¹¹⁷ Haiba una ni sika kusina kuba ni sesiñwi, ona Bupilo bwa Kreste ku wena, usweli fela kueza mwa mbango. Jesu. . . Paulusi naize, Makorinte Bapili 13, “Niha Ni ka fana liluwo laka kwa ba botana, ni kufa mubili waka kuli uciswe sina sitabelo, ha si ni tusi sesiñwi.”

¹¹⁸ Cwale, se si tata, kono ki Niti. Muna ni kutaha kufita fa niti yani, mulemuhe seo Kalvari ne i mi ezelize. Lwa italima, ni kubulela kuli, “Oh, eeni, sani ki sesinde.” Sani ha ki sona. Haiba Mwana Mulimu yani nana ni kuya kwa Kalvari, ku yo kokotelwa, mwana kaufela ya taha ulukela kuya kwa Kalvari. Ni yena hape ulukela kuba ni Kalvari. Mu lukela kuba ni lizazi lani la Kalvari. Ni lukela kuba ni lizazi lani la Kalvari. Lani lifeza mulatu wa sibi. Haki ku swalana mazoho ni mukutazi; haki ku swalana mazoho ni keleke; haki kukena ka liñolo; haki kukena ka musebezi. Kono ki kukena ka Kupepwa. Na si ka fa liñolo. Na si ka fa musebezi. Na file Kupepwa. Cwalo kona mo lu kenela, kuzwa foo, honafo kipeto lwapila bupilo bwa Sikreste.

¹¹⁹ Cwale, kalimelo yeñwi. Licika la puli, licika la ngu, ne ba sina sika se si cwalo. Ukona kuba puli kamba ngu. Ha u bi licika la puli ni licika la ngu. Ukona kuba puli kamba ngu.

¹²⁰ Cwale, haiba uezanga fela lika zende, mi unahana kuli uka yo kena, ka sani, konakuli ne ku sa lukeli luba lizazi la Kalvari. Mulao kona ono lukisize sani. Kono, kakuba kuli ne si lwezi lizazi la Kalvari, kuli litise sani mwateni, kuli lusike lwaba fela mamembala ba keleke, kono lube bana ba bashimani ni basizana ba Mulimu. Sani kona seo lizazi Kalvari nelili sona. Sani kona sene li talusa ku wena, kuli u kone kueza, ni kulatelela, ni kueza sina Jesu.

¹²¹ Cwale, nuka ha i kambamangi ni ku shetumuka, ka nako yeswana. Nuka i bu belanga fela kwa neku lililiñwi. Mi ni Moya wa Mulimu u zamayanga fela neku lililiñwi. Ha u kopanyangi lika ni Ona. U zamayanga fela ka kuswana.

122 Mutalime Jesu, ka ku kwala. Jesu naize, “Misebezi ye Ni eza ni mina mu ka ieza, mane yemituna kufita ye ki ye muka eza, kakuli Ni ya Luli ku Ndate.”

123 Hani buleli ze hahulu kwa keleke kwanu. Mwa utwisisa. Kono Mañusa a atepiñiwa. Likitikiti ze mashumi za ateeleza, hala lifasi.

124 Ni ka alaba puzo yani ku muhanyezi, cwanoñu fa. Nibile ni bulelanga kuli. . . ni bulezi. Ba li, “Kiñi, mwa lumela Biblele nji? Jesu naize, ‘Misebezi ye Ni eza mu ka ieza ni mina, mane yemiñata kufita ye ki ye muka eza, kakuli Ni ya Luli ku Ndate.’”

125 Mo kona kubela ya maswe, shangwe? Mo kona kubela kwahule hahulu ni kulemuha, ka lituto za litumelo za hao za mihupulo, ka maikuto a hao a minahano ya lika? Mulikana ka yalatwa ya latehile, kikuli hautwisisi kuli Biblele ye itolokiwa ka moya?

126 Jesu na lumbile Ndate kuli Na Li patezi ba baitutile, ni baba butali, ni ba ngana, ni baba talifile, mi a Li patululela kwa limbututu ze kona kutaha kwa Kalvari.

127 Cwale mulemuhe. Jesu naize. Mutalime mwa Na tomahanyelize. “Misebezi ye Ni eza,” Usweli wa ieza ona fa cwale. “Misebezi ye Ni sweli kueza cwale, kufolisa bakuli, kuzusa bafu, ku tutubula meto a libofu, misebezi ye muka ieza ni mina. Mu ipeta ye haiba mu lumela ku Na. Mu eze misebezi ye. Mi ni yemiñata ku ye mu ieza, kakuli Ni ya Ku Ndate.”

128 “Fa nako nyana, lifasi halina ku Ni bona, kono mina mu ka Ni bona. Ni ka ba ni mina, mane ni ku mina, kuisa kwa mafelelezo a lifasi. Hanina ku mi siya kusina mutiisapilu. Ni ka lapela kuli Ndate; Uka mi lumela Mutiisapilu yomuñwi, yeli yena Moya o Kenile, o lifasi li sa koni ku u amuhela; kono, mina mwakona ku Mu amuhela.”

129 Cwale mulemuhe. Yona misebezi “yemituna,” ne ina ni kuba ni Mata mwa Keleke, ha ki kufolisa fela bakuli ka tapelo, kuleleka moya ya diabulosi ka tapelo, kono ki kubeya Bupilo Bobusafeli kwa balumeli. Moya o Kenile ne u taha, ni ku beiwa mwa mazoho a Keleke, kubeya Bupilo. Oh! Sani kona seo Kalvari ne italusa. Ne ituhelimize, baana ni basali ba wile, ni kuba nanulela mwa sibaka, sa kuba bana ba bashimani ni basizana ba Mulimu, kufolisa bakuli ni kubeya Bupilo Bobusafeli; ka kufa Moya o Kenile kwa balumeli baba ipeile kuutwa, baana bene ba li baba sa lumeli linako zapili, kuli ba ezwe balumeli, ni kubeya Bupilo Bobusafeli, bwa moya. Ha ki butuna ni boo, ha bu bulelwa. . .

130 Musali ya kula yo ya lobezi fa, Na kona ku lapela tapelo ya tumelo mi uka foliswa. Yani ki nto yetuna. Sani kona sa Na eza ka nako yani.

131 “Kono,” naize, “zetuna kufita ze mu ka li eza. Ni ka mifa Mata, isini ku mu zusa fela fa nako nyana, kono ku mufa Bupilo Bobusafeli, bo bukaba Bobusafeli, kuyakuile.” Ba botana, libofu, batu baba nyandile, mu latehisa cwani seo? Kikuli ha muboni seo “butuna” sili sona? Yani kona nto yetuna hahulu yene kona ku ezahala, neli kubeya Bupilo Bobusafeli kwa batu. Bupilo Bobusafeli ki sikamañi? Bupilo bwa Na pilile, ona Bupilo bone buli ku Yena, mubeye Sani ku babañwi. Kikuli mutu wa kona kueza cwalo? Mwana Mulimu wa kona.

132 Jesu naize, “Bao kaufela mu ka swalela libi za bona, ku bona lika swalelwa; bao kaufela mu si ke ku swalela libi za bona, ku bona lika siyala ona cwalo.”

133 Cwale fa ki fona fo keleke ya Katolika ni babañwi babañata babile ni mafosisa amatuna hahulu. Baya kwande mi bali, “Ni swalela libi za hao.” Sani ne si sona.

134 Ki cwani mo ne ba swalelanga libi, mwa Bible? Pitrosi na alabile puzo yani, ka Lizazi la Pentekota. Ne ba ize, “Ki sikamañi se luka eza kuli lupiliswe? Kana lukaba cwani ni se mu nani Se mina kaufela?” Na yalile muzamao. Na ba bulelezi sa kueza.

135 Na ize, “Mubake, mañi ni mañi wa mina, ku Mulimu, mi mu kolobezwe ka Libizo la Jesu Kreste.” Ka sikamañi? Swalelo ya sibi sa mina. Ki yani misebezi “yemituna” fani.

136 Ki babakai, bakutazi kakusasana cwana, ki babakai, mina muteeleza kwa Linzwi la ka fa tepu ya silimba, kikuli mwa itakaleza kuya kwa Kalvari kakusasana cwana? Mi mutalime sa na muezelize Mulimu kwani. Mi mu hane lituto za likopano, ni kukuta Evangeli. Haleluya! Linzi fa mahutu amina cwale. Ki sikamañi se mu ka eza ka Lona?

137 “Kakuli kubaka ni swalelo ya libi luswanezi ku kutazwa ka Libizo la Hae, kwa lifasi kamukana, kukalela kwa Jerusalema.” Haleluya! Kanya! Ki fo he cwale.

138 Ki sikamañi seo Kalvari italusa ku mina? Ki sikamañi seo lizazi lani neli ezize ku mina? Kikuli ne li mi bezi bunyinyani, ka lituto zeñwi za bulapeli? Kana neli pangile kuba ba muikuhumuso? Kamba ne li ku ezize kuba Mukreste, ku lekiswa? Haleluya!

139 Sibi, si swalezwi! “Misebezi yemituna kufita ye mu ka ieza.” Mwa bona bao “mina” muli bona, nji cwani? “Misebezi yemituna kufita ye,” ku swalela libi, ka Libizo la Jesu Kreste.

140 Kono ka lituto za bulapeli ni likopano, ni zeñwi cwalo, si mi tamile fa sibaka sesiñwi, mu sa sebeleza lifasi. Mu ni bulelele muuna kaufela, mu ni bulelele musali kaufela, ya kona kutaha kwa Kalvari ni kulika kuba mutu yomuñwi yomutuna kakuli yomuñwi na bulezi sesiñwi. Mu ni bulelele fo mukona kutalima mwa pata ya Kalvari, mwa liseli la yona leli lukile, zazi lani fa Kalvari. Mukona kuba cwani ni lizazi fa Kalvari, ni kukuta ni

muikuhumuso? Ki ka mukwa ufi hamukona kukuta sina sipupe sa kopano, ni kukutaza lituto zeñwi za bulapeli za ipangezi mutu? Ki kabakalañi hali sa ku kokobezi kwa Linzwi la Mulimu? Haiba ukile wa ya kwani, uka kuta kwani inze uikokobelize. Kana ukona ku tabela cwani kuba nto yetuna mwa kopano ya henu, ni lifufa mwa kuwani ya hao, kanti Jesu Kreste Mwana Mulimu na ikokobelize Iliyena mwa mubili osina tuso, kwa sifateho sene sikwelakiwa mati, kufitela maswabi ni lishwau? Mi ba pazaula liapalo za Hae, ni ku Mu kokotela, fapila lifasi. “Ku itoboha maswabi.” Ukona kuya cwani kwa Kalvari ni kuzwa uli nto yeshutana kufita sa Na li sona, ni lishwau, ni maswabi?

“Oh,” mu li, “baka ni lahela kwande.” Haba lahe kafoo.

¹⁴¹ Ipumanele lizazi la hao fa Kalvari, Mulimu ukaba ni nzila ya Hae ka wena. Mutuhele ni bulele sani hape. Ipumanele lizazi la hao fa Kalvari, Mulimu ukaba ni nzila ya Hae ka wena.

Halu lapeleni.

¹⁴² Mulena, O Mulimu, aku luise kaufela luna kwa Kalvari onafa cwale. Lu zwe ku za luna, Mulena, sabo ya batu, sabo ya seo mutu kaufela uka bulela. Kiñi, lifasi kamukana ne li Mu sehile, la Mu soma ka lisheha. Kono Na ipeile kuutwa, kuisa lifu. Na ipeile kuutwa, kuisa kwa ku shubulwa. Na ipeile kuutwa, mane nihaiba kwa mata a zamaiso ya muuso.

¹⁴³ Mi lu lemuha kuli fani Satani hana natile lifasi le, na tiloba mubusi ni mata mwa lifasi le. Na pakile zeswana fa pila Mulena luna, mi ali, “Mibuso ye ki yaka. Ni ka eza ka yona mo Ni latela.” Mi lu lemuha kuli, kuzwa ka lizazi lani ku le, lifasi le, mwatasa sikuto, li bile li busiwa ki yena yana li kutile.

Kono, Mulimu, O Mulimu, lu sebeleza Mibuso o si ka kutiwa.

¹⁴⁴ Ndate, Mulimu, ka mo kubezi bunde, kuli U ezize lika zetuna mwa—mwa siswaniso sa lifasi kacenu. Kutuhela maswaniso tuna a, sina *Milao ye Lishumi*, ni zeñwi cwalo, ze tiile, ili kuli baana ni basali babone, zani ne li si ke mane nihaiba ku unsufaza sikwalo sa keleke, kono ba kone kubona seo sili sona. Nzila ya Mulimu ki nzila ye hanilwe, ka lifasi. Kakuli lu swana sina . . . Lu kena mwa Russia ka tumelelano ya sikwata.

¹⁴⁵ Lu inzi mwa lifasi le, kono ha luba lifasi le. Lu ile kwa Kalvari. Lu ikokobeza luna bañi, kwa Mibuso wa Mulimu, kuba babañwi ba Hae. Hakuna taba kamba lifasi li bulela sikamañi, lu ya ka nzila ya baba nyinyani baba kendilwe ba Mulena. Luya kwa zuho, mi lu lumela kuli sani si sutelezi cwanoñu fa kaufi, Mulena, kufitela luka zuhela kwa Mibuso o ka yola lifasi le. Sina Daniele ha na li boni, mi za loba lifasi kaufela, mwa liemba ze nyinyani, mi moya wa li fukiseza kwahule inge siubeliso sa kuubelisa makonga. Kono, lilundu, Licwe ne li hulile kuba lilundu lelituna lene li apesize lifasi. Licwe lani li ka taha. O Mulimu, lu bata kuba siemba sa lona. Ha luikane luna bañi,

lu lwale lifapahano zaluna ka zazi, lu pilele Kreste, kupilela babañwi. Lumeleza cwalo, Mulena.

¹⁴⁶ Kuna ni babañwi mo kakusasana cwana, baba sa Mu zibi kuba Mupulusi, mi ba tabela ku hupulwa mwa tapelo ya kukwala, mi mu tabela kuli ibe lizazi la mina fa Kalvari, kana mu ka nanula mazoho a mina, mi muli, “U ni lapelele, Muzwale Branham. Ni bata ku Mu ziba ka kuba Mupulusi wa ka.” Mulimu aku fuyole, mulikani munyinyani. Yomuñwi hape? Mulimu aku fuyole, muzwale waka kwa mulaho ka foo.

¹⁴⁷ Kana kukaba ni yomuñwi hape? Yali, “Ni bata ku Mu ziba. Ni bata kuli le ibe lizazi fa Kalvari, la ka. Ni katezi ni nyikwile. Ki butokwa mañi bwaka kuli ni ine fa ni sika se ne Ni pepezwi kueza? Ne ni pepilwe, kupepwa kuli ni be mwana Mulimu, mi fa Ni sweli ku kumalela kwa lika za lifasi. Mulimu, tuhela kuli ni kokotelwa kacenu. Tuhela ni kokotele, kacenu, ilina ni maikuto aka, kuli Ni kone kupila ni Kreste, ni kupilela babañwi. Hakuna taba kamba ba eza sikamañi ku na, ku ni shubula ka lisomo, ni ku ni nyandisa, ni kubulela ze maswe kaufela ku ni lwanisa, ni zeñwi, tuhela fela kuli ni zamaye ka buikokobezo, ni kuishuwa, sina ngunyana, sina mwa Na ezelize. Mi zazi leliñwi, U sepisize ku ni zusa hape, ka Lizazi la mafelelezo. Ni libelezi Lizazi lani.” Kikuli kukaba mazoho amañwi aka nanuha mwa halimu? Mulimu ami fuyole kwa mulaho kafoo, ni wena. Ku lukile. Babañwi fela . . . Mulimu aku fuyole. Mulimu aku fuyole. Babañwi hape, kuli lusika lapela kale.

¹⁴⁸ Ndata Luna Yakwa Lihalimu, ne kuizwe, fani Pitrosi hana kutalize ka Lizazi la Pentekota, “Buñata bwa babane ba lumezi ne ba ekelizwe kwa Keleke.” Neba lumezi ka niti ka lipilu za bona kaufela. Batu baba nanuzi mazoho a bona ba, Ni lumela kuli ba lumezi ka lipuli za bona kaufela. Mi haiba ba lumezi, kuna ni siliba sa mezi se si libelezi kwanu. Ba bata kuli libi za bona li swalelwe. Kuna ni yomuñwi mo ya ka ba kolobeza ka Libizo, mi ili Libizo fela le liliteni mwatasa Lihalimu leli filwe kwa batu, kuli lu piliswe.

¹⁴⁹ Kakuli, sina ha Ni bulezi Mañolo linako nyana ze fitile, kuli, “Kubaka ni swalelo ya libi lilukela ku kutazwa ka Libizo la Hae, kwa lifasi kaufela, kukalela kwa Jerusalema.” Mi kwa Jerusalema, fani kubaka ni swalelo ya libi hane li kutalizwe, muapositola na ba bulelezi ka za Mañolo, ni kubulela kuli neba lukela “kubaka, pili, mi kipeto ba kolobezwe ka Libizo la Jesu Kreste.” Wani neli musebezi wa mukutazi kueza. Kuli bona ba bake, ni kuli yena a ba kolobeze kwa swalelo ya libi za bona. “Be muka swalela libi za bona kamukana, ku bona lika swalelwa; be musike ku swalela libi za bona kamukana, ku bao li ka siyala ni bona.”

¹⁵⁰ Ndate, kana lifasi ne likeni cwani mwa buhali sina mo li kenezi cwale? Ki kabakalañi ha ba sa lumeli Evangeli ye bunolo?

Mi mane ba kenya zeñwi, ku yona, ili ku yolisa: maibizo a buhata, kolobezo ya buhata, likolobezo za Moya o Kenile za buhata, ku swalana mwa mazoho ni bakutazi, kuitusisa malumbatina a Ndate, Mwana, Moya o Kenile, asiyo mane nihaiba mwa Mañolo; neli koranta yene ezizwe ki baana ba Maroma, ha ki tuto ya Sikreste kai kamba kai mwa Bibebe. Swalelo ya libi haikoni ku taha ka malumbatina, kono ki ka Libizo la Jesu Krete.

¹⁵¹ Cwale, Ndate, lu ziba kuli ha ki taba ye zibahala. Linzila za Hao libile li cwalo kamita. Kono tuhela kuli baana ni basali, kakusasana cwana, batahe kwa lizazi lani, zazi lani fa Kalvari. Koo, Jesu, hana shubulwa zazi lani, ona maswabi ani, ku mu tubula liapalo, ku pumakiwa mwa liemba, ku mu kwelaka mati, ni ku mu soma ka lisheha; ka lifasi kaufela, ka keleke, ka batu bene ba lukela ku Mu lata. Mi, ibo, mwa lika zani kaufela, Na si ka atamisa mulomo wa Hae, aya ku yo shwela batu bene ba Mu soma ka lisheha.

¹⁵² Mulimu, aku luise kwa Kalvari kakusasana cwana. Mi haiba ba bulela kuli lwa lyangana, bali lu utwisisa Mañolo ka kufosahala, kaufela se ba bata kubulela, Mulimu, ha bakoni ku yema fa Pila Mulimu ni kubulela kuli li fosahalile.

Habakoni ku apesa libi za bona ka Bibebe. Bibebe ya apula libi za bona: kusa lumela kwa bona; ku zibahala; kueza sina buñata bwa sicaba sesiñwi. Ha ba tahe kwa Kalvari kakusasana cwana.

¹⁵³ “Mi kukalela kwa Jerusalema; kubaka ni swalelo ya libi li lukela ku kutazwa ka Libizo la Hae kwa linaha kamukana, kukalela kwa Jerusalema.”

Habange ona muhato oswana wani wa ku kokotelwa ba pazulwe; ni ku kwelakiwa mati; ni ku boniwa bukuba ka lisomo; mi babizwe lika kaufela ze kona ku bulelwa mwa litaba za bahanyezi ba bulapeli; bashandauli ba likeleke; kaufela se ba bata ku ba biza sona.

Ni luna, Mulena, kakusasana cwana, lunge nzila ya luna ni babanyinyani baba kendilwe ba Mulena. Lu zamaye sina ba apositola mo ne ba ezelize, kusina kufapuhela kwa silyo kamba nzohoto, mi kuzwa kwa bunde ba lipilu za luna lu sebeleze Mulimu. Lumeleza cwalo, Ndate.

¹⁵⁴ Cwale, folisa bakuli ni baba zielehile ba banze ba taha mwa mukoloko wa ku lapelela. Mi haili baba nanuzi mazoho abona ba, mwa lipilu za bona, babake, ona fa. Mi cwale bona ba bayemi kwa mulaho fa nako yetelele, kapili ba kene mwa mezi mi libi za bona li swalelwe ka Libizo la Sitabelo, Jesu Krete, yena Mwana Mulimu. Amen.

Fa sifapahano fana shwezi Mupulusi waka,
Neli kwani kone Nitapile libi za ka ka kulila;
Mi mwa pilu yaka Mali atoziwa;
Kanya ku Yena . . .

Kanya kwa Libizo la Hae!
 Oh, kanya kwa Libizo la Hae!
 Oh, Mi mwa pilu yaka Mali atoziwa;
 Kanya kwa Libizo la Hae!

Ni pilile ka muhau kuzwa kwa sibi, (Cwani?)
 Jesu upila mwahali ha munati,
 Kwani kwa sifapahano kwa Na... (Ube
 alimuñwi wa Hae.) mwahali;
 Oh, kanya kwa Libizo la Hae!

Kanya kwa Libizo la Hae!
 Kanya kwa Libizo la Hae! (Libizo Lelinde.)
 Oh, kwani . . . mwa pilu yaka Mali atoziwa;
 Kanya ku Yena . . .

155 Kana sani ha siezi buino bo buñwi ku mina? Sa mi kenisa fela. Si beya sepo ku mina: Bupilo, Bupilo Bobusafeli.

156 Kana “ku kokotelwa ni Kreste” ki sikamañi? Ki kupilela babañwi. Ki mufuta o cwani wa babañwi? Bani baba mi toile, bani ba basike ku mi lata, bani ba bakona ku mi soma ka lisheha: mupilele bona; mube ni bona; mu ba late; “mu lapelele bani baba mi nyandisa, baba bulela litaba kaufela ka buhata, ka Libizo la Ka. Ne ba nyandisize bapolofita bene bali kwa pili ku mina.”

157 Ni hupula kuli Liñusa lika tusa kekeke hahulu kakusasana cwana, kuli mubone kuli lutokwa Kalvari, lutokwa sifapahano.

158 Cwale ki sikamañi se si ezahalile? Kaufela li lifilwe. Kezeli mwa wiuceya, kwa sicaba kwanu sesi kula mi si nyandile: Kaufela li lifilwe; taba fela ye mu lukela kuezwa ki kulumela kuli ki ya mina; ku i amuhela ka nzila ye swana, mi kipeto muka foliswa.

159 Muhupule: Cwale ki sikamañi sani? Mwa kona kuya mwa lifasi, mukutaze Evangeli, mufolise bakuli; mi mubeye Bupilo Bobusafeli.

Li kaba cwani zetuna: zani, ki yo fa muuna ya lobezi ni—ni ku luluha, kansa, kamba ki sikamañi kaufela. (Lu Mu boni linako zeñata hahulu ha beya limbuyoti za Hae ni kufolisa muuna yo, na folisize musali; likiti ze mashumi amañata ñata za litaba ze komosa mwahala lifasi, mwabona, ku ba nanula kuzwa mwa mimbeta, milamu; ki miluti fela ya batu baba katazwa ki kansa; kacenu, baba iketile, batu baba iketile mwa mubili.) “Misebezi ye Ni eza ni mina mu ka ieza; kono ye mituna ni kufita mu ka ieza”: “kufita ye,” kona ye lukile.

Sikamañi? Ni ba file kekezo ya bupilo, ka Libizo la Jesu, ku ekeza bupilo bwa bona ka mazazi a likani.

Kono, “Yemiñata kufita ye mu ka ieza: muka bafa Bupilo Bobusafeli ka Libizo la Ka.” Whew!

160 Ki kabakalañi hane mu ka swabela Libizo lelinde lani? Ki kabakalañi batu hane ba ka li swabela ni ku saba ku lona? Ki diabulosi. Luli.

161 “Kubaka ni swalelo ya libi li lukela ku kutazwa mwa Libizo la Hae kwa lifasi kamukana, kukalela kwa Jerusalem.” Kwani kona kone kuile Liñusa pili. Ki niti kana? “Kubaka ni swalelo ya libi li lukela ku kutazwa mwa Libizo la Hae, kukalela kwa Jerusalem.”

162 Cwale, pili, luka eza sina mwa Na ezelize: kuba ni tapelo ye ka folisa bakuli.

163 Kutuha foo, lukaba ni mpo yetuna: Mezi a lukile, kwa mulaho kwanu, ku yo kamukana ya bata ku kolobezwa (kuna ni libyana kwanu za basali, libyana mo za baana), munze muyemi ku libelela kuli libi za mina li swalelwe; kakuli muhupule, kuli mukona fela kuba ni libi zamina ku swalelwa kuya ka tuto ya Bibe. “Kakuli hakuna Libizo leliñwi hape mwatasa Lihalimu leli filwe kwa batu, le mulukela kupiliswa ka lona.”

164 Paulusi na kopani ni babañwi bene ba kolobelizwe. Mi ne ba huwaka, neba na ni tulo. Na ize, “Ki ka ifi yene mu kolobelizwe?”

Se bali, “Ku Joani.”

Ki hali, “Joani na kolobelize ka kubaka.” Cwale, muteeleze seo: kwa kubaka, isiñi kwa swalelo ya libi. Ki babakai baba utwisisa cwalo? Isi ka swalelo ya libi. Ne ba kolobelizwe hande ku lukile, kwa kubaka. Ne ba bakile: “Eeni, sha, Ni bakile. Na, lumela kuli Wa taha.” Neba kolobelizwe *kwa kubaka*; fo ki kuli, “kulumela ku Mulena Jesu Krete.”

165 Mi basino utwa *cwalo* (kuli Sitabelo ne si tile kale), nebatilo kolobezwa sinca, ka Libizo la Jesu Krete. Mi cwale, ne ba filwe, mi hana ba beile mazoho, Moya o Kenile; mi ba bulela ka malimi asili ni kupolofita.

166 Cwale, muka cinca cwani Liñolo lani? Ha mu supe munwana wa mina fa sibaka silisiñwi mwa Bibe koo mutu ufi kaufela akile a swalelwa libi za hae, mwa Testamente ye Nca, mi akile a kolobezwa ka mukwa usili kwanda Libizo la Jesu Krete.

167 Mu ni bonise sibaka silisiñwi mwa Bibe ko mutu kaufela na kile a kolobezwa ka Libizo la Ndate, Mwana, Moya o Kenile. Kamba mu ni tiseze likande, likande la kale la keleke leli bonisa ko kukile kwa kolobezwa mutu kaufela ka Libizo la Ndate, Mwana, ni Moya o Kenile, konji kasumulaho wa lilimo ze mianda ye milalu ni zeñwi kasumulaho wa lifu la muapositola wa mafelelezo, fani keleke ya Katolika ha i to onga ongiwa.

168 Cwale, Ni na ni ba *Pre-Nicene Fathers*, ni ba . . . litaba za kale kaufela, ni babañwi, mwahala lipatisiso za ka: litaba za kale luli, litaba za kale za butokwa mwa lifasi; ona niti ye pakilwe ya luli ye lu nani.

169 Mubale *Our Sunday Visitor*, kamba katekisema ka keleke ya Katolika, mi mu li talime, se li bulela: “Babañwi ba Baipanguli ba ka piliswa, kakuli kuti ba kubamela kwa tuto ya Katolika: Kakuli Bibebe yabona ili, ‘mu kolobeze ka Libizo la Jesu Kreste,’ kono lu tokolomohile butokwa bwa ‘Libizo la Jesu,’ ni ku bu beya ku ‘Ndate, Mwana, Moya o Kenile,’ mi ba lumela cwalo.”

Cwale, muni bonise Liñolo leli lwanisana ni sani.

170 Mi ki fo he cwale. Mi kanti, lifasi la kubamela ku zona luli. Kiñi? Haba sikaba kale kwa Kalvari. Kona cwalo. Bali kuba ba bone.

171 Baka mi soma ka lisheha ni ku mi biza kuli. . . mane ba ka mi biza kuli, “Mupikuluhi ya kenile,” “Jesu fela,” ni mabizo ani kaufela a ku nyefula o bakona. Ki shutano mañi ye si eza ka se ba mi biza? Ki sikamañi sene ba. . . U tokomela se ne ba Mu bizize? Na takisizwe. Na pilezi Mulimu, ni Mulimu anosi. Mi haiba ona Moya o swana wani, onoli ku Yena, uba ku mina, uka mi konisa kueza lika zeswana: kuba ni Libizo la Hae. “Kaufela se mu eza” (ki Bibebe yeo) “ka manzwi kamba ka likezo, mu si eze kaufela ka Libizo la Jesu, munze mufa tumbo ku Mulimu.”

172 Ki kai ko mu zusa bulalu bwani, tuto ya bu hedeni? Yezwa mwa katekisema, ha izwi mwa Bibebe. Linzwi lelili “bulalu” mane hali bulelwi nihaiba mwa Mañolo kaufela kuzwa Genese kuisa Sinulo. Hakuna sika se si cwalo. Hakuna sika se si cwalo sakuli mulimu wa bulalu. Ki Mulimu, Mulimu anosi, Mulimu alimuñwi. Ubile fela Mulimu alimuñwi kamita. Na inzi mwa liofisi zetalu: Na kile aba ku yebizwa Ndate, ku Mushe. Na inzi ku yeñwi mwa nama, kakuba Mwana, Jesu. Uinzi ku yeñwi cwale ka Moya o Kenile. Kono ki Mulimu alimuñwi. Mulimu alimuñwi, isi ka mabizo a malalu. Liofisi zetalu, malumbatina amalalu mwa Libizo lililiñwi: Jesu Kreste.

173 Sika kaufela sesi shutana ki sa buhedeni; mi Ni kupa kuli yomuñwi apake sani, haiba ha ku cwalo. Yani ki niti. Ni bulezi cwalo ka lilimo ni lilimo ni lilimo, mi hakuna yakile ayema ku batisisa, niteñi (Mwabona?), kakuli halikoni ku ezahala. Ni na ni. . . ki ye fa Bibebe, pili; mi kuna ni makande akale apaka kuli ki niti luli. Mi kiñi diabulosi hasweli fela ku. . . ? Ni. . . Kihande, Bibebe ibulezi kuli bakaba ona cwalo: “Baka taha cwani, kwanda kuli Ni ba bize?” Zani kona fela ze Ni ziba ka zona. Sani kona sa na bulezi Jesu, kacwalo. . .

174 Hani buleli cwalo kuli ni be. . . Haiba Ni bulela cwalo, ni kukutaza kutazo yeswana sina ye, Ni kaba muipi ya kwatasa hahulu mwahala mina. Yani ki niti. Ni bulela cwalo kakuli Ki Niti mi Ki Bupilo. Kaufela baba kolobelizwe ku Krete, ba apezi Krete. Bana ni Bupilo, ka Libizo la Hae.

175 Lu lapela ka Libizo la Hae, lu bata ka Libizo la Hae, lu kutaza ka Libizo la Hae, ku kolobeza ka Libizo la Hae, lupila ka Libizo la Hae, lu shwa la Libizo la Hae, lu ya kwa Lihalimu

ka Libizo la Hae, lu zuha ka Libizo la Hae. “Lubasi kaufela mwa Lihalimu lu bizwa kuli Jesu.” Bibebe ibulezi ona cwalo: “Lubasi kaufela lwa lifasi lu bizwa kuli Jesu.” Na ize, “Ni tile Ka . . .”

Mu li, “Kihande, ki Libizo la Ndate.”

Ndate ha ki libizo, ki lilumbatina. Na ize, “Ni tile ma Libizo la Ndate, mi ha mu si ka Ni amuhela.” Cwale, ki Libizo mañi la Na tile ku lona? Uh-huh. Kaniti, “. . . mi ha mu si ka Ni amuhela.”

¹⁷⁶ Kacwalo ki fo he cwale; fela li, eehe, lipatezwi meto a baba butali ni ba ngana. Luli, kona mo liinezi, uh-huh.

¹⁷⁷ Mi mwa Sinulo, sina hane lu lutile zazi leliñwi: kuna ni keleke ya lihule ya kale, yeli kopano ya pili; mi na nani sikwata sa bana ba basizana bene ba pepilwe ku yena. Ba eza lika zeswana, mukwa oswana. Kaufela yena u felela mwa Babilona, ka mukwa oswana, ana ni . . . keleke ya Rome ni katengo ka likeleke za—za linaha; mi ki yani fani, kaufela inza yunda, kamukana mwa lika zeswana, mukolo o swana.

¹⁷⁸ Kono Keleke ya Mulimu (Haleluya!), ki Keleke ye bizizwe, i kauhani. Kana Keleke i yahilwe cwani? Muka ziba cwani zeo? Kana mukona kuziba cwani kuli ye ki Niti? Ni Mulimu ha ipatulula ku wena. Knana neli—kana neli ka mukwa ufi Abele hana zibile kuli neli ngu kufita ma apule? Ne ku patuluzwi ku yena: “Ka tumelo Abele na file ku Mulimu sitabelo sesinde ni kufita.”

¹⁷⁹ Kutulukuka fa Lilundu la Kubenya, Jesu naize, “Kanti batu bali ki Na mañi?”

Babañwi bali, “Elia,” “Mushe,” ni zeñwi cwalo.

Yena ali, “Kono Na mi buza, ‘Mina muli ki Na mañi?’”

Pitrosi ali, “Ki wena Krete, Mwana Mulimu ya pila.”

¹⁸⁰ Na ize, “Ha u si ka ituta se. . .” Ka manzwi amañwi (Ni bulela se, isi kuba yomutuna, kono ki kubeya kutwisiso ya taba): “Ha u si ka ituta se kwa sikolo sa bulapeli; hakuna mutu yakile aku luta seo; kono ki Ndate Luli, yali mwa Lihalimu, ki yena ya ku patululezi seo ku wena: kuli Ki Na (isiñi Ndate, Mwana, ni Moya o Kenile, kono, Ki na Jesu Krete). Mi fahalimwa licwe le (Licwe mañi? Ona kone kuile Abele; fa licwe leliswana lani.), fahalimwa licwe le, ona Niti ye sinuzwi ya Mulimu, Ni ka yaha Keleke ya Ka, mi minyako ya lihele haina ku i koma.” Yani ki niti. Ika lika kueza, kono haina ku koma. Mwabona?

¹⁸¹ Kacwalo muye fela kwa Kalvari, mu kokotelwa, mukute mukalise, mi mu ye ka nzila ni babanyinyani baba kendilwe ba Mulena, muzwelepili pili.

¹⁸² Cwale, Mulena, lu beya lika kaufela ku Wena. Hani zibi, kuzwa mwa sikwata, se sili mwahali mo. Hanina muhupulo ni omukana o ni ziba, Mulena, konji hane ha No ka u patulula.

Mi cwale, Mulimu Ndate, Hani Ku kupi kuli ueze cwalo. Ni li beile fela fa mahutu a sicaba. Ki bani ba inzi fani. Mi ye haibe Kalvari ya niti kakusasana cwana; haibe sifapahano sa luli kwa ku itakaleza, ni kwa litakazo za kuipa, ni kwa lika zetuna za bupilo.

¹⁸³ Mi batu ba ikokobeze, mi ni ku lakaza kuya ka nzila ni babanyinyani baba kendilwe ba Mulena. Haba zamaye ka kuishuwa. Haba pepwe mwa Mubuso wo, ona Mubuso omutuna wa Mulimu wo, oli mubili wa moya, mubili wa moya wa Kreste fa lifasi: “Ka Moya ulimuñwi kaufela luna lu kolobelizwe mwa mubili ulimuñwi.”

¹⁸⁴ Peta cwalo, Mulena. Kamba ki ba bansu, ba basweu, baba ñandatalukeke, baba halaleha, kaufela sebali sona, baana kamba basali, bazike kamba baba lukuluhile: kaufela luna lu ezizwe kuli lunwe kwa mezi a Moya o swana.

¹⁸⁵ Peta cwalo, Ndate, mi haibe ka...mwahala babañata, kakusasana cwana, kuli ba utwisise; mi U kwalule kutwisiso ya bona. Mi, ikaba sina lizazi lelinca ku bona: lizazi lika benya, mi liseli le lisabisa la lituto za bulapeli bwa ipangezi mutu lika tima kapili, mi Liseli la Mulimu lika benya mwa linzila za bona, ni kupunya lisila leli tibezi Liseli lelinde lani. Mi ba kone ku zamaya nzila ya kukena, mi, ba pilele babañwi, sina Kreste mwana ezelize.

¹⁸⁶ Cwale halunze lutisa mukoloko wa ku lapelela mwateni, Ni lapela kuli U toze batanga ba Hao kakusasana cwana, kaufela luna, halunze lu lapelela, yomuñwi ni yomuñwi. Mi u alabe, kacenu, kuli mutu kaufela yakula ya taha mwa mukoloko wa ku lapelela wo a foliswe. Haba kute, sina musizana yomunyinyani wa meto a masisani, mi mushimani yomunyinyani, mi haili. . .ni kalibe yomuhulu yani, mi—mi Muzwale Wright, mi buñata bwa bani ba batile kacenu, Mulena, ni matuku ni makulano ni zeñwi zeo baalafi ba palezwi ku alafa; mi kiba fa kacenu (seli fela sunda ye fitile), mi ki ba fa, baiketile, kacenu.

¹⁸⁷ Mulimu, mi baana ni basali ba tahe ka tumelo yeswana yani, ka kuziba kuli ba ya kwa Kalvari kwa ku yo kokotelwa kwa mihupulo ni maikuto a bona kuli base “ba folile kale.” Mi mata ana zusize Jesu kuzwa mwa libita abafe bupilo, bupilo bobutuna bwa tumelo.

¹⁸⁸ Mi cwale, kapili kasamulaho wa se, buñata bu tahe kwa lisa la kolobezo. Lwa kupa, ka Libizo la Jesu. Amen.

¹⁸⁹ Cwale, luna ni fela mizuzu ye mashumi amabeli akuba ni mukoloko wa litapelo ni sebelezo ya kolobezi. Cwale haluna makadi a litapelo. Lu felezwi ki ona, mi luka lika kueza katata mwa mikopano yemituna kaufela fo luka kalela. Ni mi bulelezi mina kaufela, lu li beile kale, luna ni zona fa tepu, ni kaufela ko Ni yanga, matepu ani aka lumelwanga teni.

¹⁹⁰ Sisupo sona si supa fela kwa mbuyoti. Mulelo neli kuli, “Haiba mu lapelela bakuli, mu bone kuli sicaba sa mi lumela.”

Se nili, “Ha bana ku ni lumela.”

Yena ali, “Uka fiwa lisupo ze, mi ka se ba ka lumela.” Lisupo li zamaile fa ni fa, ka lilimo ze lishumi mwahala lifasi, kusina nihaiba nako iliñwi fo likile za palelwa. Hakuna kupalelwa, ni hanyinyani, ku zona. Ki babakai babaziba kuli yeo ki niti?

¹⁹¹ Kihande, haiba mukona kulumela sisupo, konakuli mu lumele Liñusa. Yani ki niti. Ya li bonisa. Mi kana Mulimu wa kona kubeya kuna Liñusa (Ni kuli libe ze petehile hande cwalo, kono kiñi . . .) mi Ni mi bulelele sesiñwi sa buhata? Mulimu hana ku ni tuhela kuli ni eze sani. Batili, batili. Batili, sha. Ni mi bulelela Niti.

¹⁹² Cwale, mina kaufela baba bata ku lapelelwa, lubulele cwalo, kwa neku le, mutahe kwa buse bo, haiba muka eza cwalo, kwa neku leo, mutahe kwa neku la silyo. Mi kipeto sani si ka tuhela batu kutaha hande ni ku to lapelelwa. Kasamulaho kipeto lukanga—lukanga bashimani, batoneli fa munyako baka tokomela; mi habanze ba taha cwalo kwanu, kipeto kwa neku la buse bo, luka ba kenyeza kwa mulaho, ni kuba tisa mwahali mwani. Mutu kaufela a lapelelwe.

¹⁹³ [Yomuñwi ubulela ku Muzwale Branham—Mu.] Oh, batili, cwale, Nali kuba. Kihande, nako kaufela ye mubata kueza. Haiba taba. Mwa kona ku mutisa, kamba mina . . . Na kona . . . ha mu mutise kwanu cwale, kamba fa nako nyana kasamulaho, nako kaufela ya bata kueza cwalo, haiba taba.

¹⁹⁴ Cwale, halubeñi fela ka kukuza mo ku kona kubela, ka mizuzu ye likani yetatama ye. Ni bata cwale kuli mina kaufela munahane cwale: Cwale, ki sikamañi sene—ki sikamañi sene ibulezi Bibe! “Tapelo ya tumelo ika pilisa ya kula.” Ki babakai baba ziba kuli yeo ki niti? Ki babakai baba ziba kuli Bibe! ibulezi kuli, “Lisupo ze lika latelela baba lumela. Misebezi ye Ni eza muka ieza ni mina?” Mi cwale misebezi neli ifi? Na ize, “Na kona haiba mu lumela kuli Na kona kueza zeo.” Kana ki niti yeo nji?

Puzo yaka neli cwani? “Habana ku ni lumela.”

Na ize, “Lisupo ze lika batusa ku lumela.”

¹⁹⁵ Cwale, haiba mu lumela, mu itukise: Ye ki hola ya mina ya ku tamuluha. Kuswana fela siina mo ku kona kubela ku tamuluha kwa sibi, ki sepiso yeswana ya Mulimu ya swana.

¹⁹⁶ Cwale, luna ni musali nyana, ya kula fa, yana ni butata bwa mwa mba, u zwa kwa New Albany. Luka mu lapelela, pili, kuli akone kuba ni—abe ni kuina. Cwale, ka kukuza, mi mutu kaufela, cwale. Ni bata kuli mizwale i ni tuse, kwanu. Mi halu inamiseni litoho zaluna fa nako nyana, cwale, kwa tapelo.

¹⁹⁷ Cwale, Ndate ya kwa Lihalimu, le libile Linzwi la Hao. Hani na buikalabelo ka kezo ye ka ezahala ka ku lona, kono Ni na ni buikalabelo ka ku li kutaza. Mi ka kuziba cwana kuli (mi ka kuziba kuli Ni muuna wa myaha ya bunca cwale, mi zazi leliñwi ni lukela kuku Bona): Ni kutsalize Niti kuzwa mwa pilu yaka. Wa ziba cwalo. Isiñi kakuba ni ketululo, haiba sani si cwalo, Mulena, konakuli Ni tokwa kubaka.

¹⁹⁸ Mi Ndate, Ni lapela kuli Uka tusa, cwale, halunze luya kwa ku lapelela bakuli, mi tapelo yaka ha i alabile, isiñi fela litapelo za ka, Mulena, kono litapelo za keleke ye, sina batu baba botanile ba. . . Kucwani kambe yo neli musala ka ya yemi fa? Kucwani kambe yo neli yena, ya inzi mwa wiuceya? Kamba kezela ka? Bo ma? Oh, Mulimu, folisa sicaba se. Kana ha Uezi cwalo, Mulena?

¹⁹⁹ Talima, baba yemi mwa mukoloko wa litapelo: ni butata bwa pilu, kansa, ku luluha, matuku a mifuta kaufela ni makulano. Buñata bwa bona basweli ba taha (mianda anda isweli ku tamuluha, kukalela ona kwanu, Mulena), mi ba si bona, mi ba lumela cwalo, mi basweli kutaha mwa mukoloko wa litapelo ku to amuhela zeli za bona. Ba taha kwa Licwe leli pila cwale, isiñi mutanga Hao, kono ku Mwana Hao, Jesu, yali yena Mueteleli wa Keleke, yena Mutu wa moya, wa kuntu mwahala luna. Mi halunze lu ya, kuipeya mwa Libizo la Hae (No ize, “Ka Libizo la Ka baka leleka mioya ye maswe.”), Ni lapela kuli U alabe litapelo zaluna, ka Libizo la Jesu. Amen.

²⁰⁰ Cwale, mutu kaufela abe mwa litapelo. Cwale, se ki siemba sa mina, ni mina. Ye ki tapelo ya mina.

Cwale musali yo munyinyani yo ulukela kushwa, haiba Sesiñwi ha si mutusi.

²⁰¹ Ki babakai baba ziba Muzwale Stadskev? Muzwale ni Kezeli Stadskev? Ne ni bizizwe kuzwa kwa Germany halalu busihu bo buñwi; mbututu wa bona na shwile. Ne ba buzize, “Muzwale Branham, lu ku boni, ka Moya wa Mulimu, ha uzusa bafu,” (Neba yemi kwani ni kotalima. Mwabona?) “mi luziba kuli u mupolofita wa Mulena. Ubulele fela Linzwi.”

Se nili, “Hani koni kubulela, konji haiba li beiwa mwa mulomo waka.”

“Utahe kwa Germany.” Ne ni nanuhile kapili. Mi na ni lumela luwaile: “Luna ni fulai ya jeti yekona ku kutisa kwa Germany mwa liholo ze silezi.” Jeti ya lindwa ye ne kona ku ni fufiseza kwa Germany ku yo zusa mbututu ya na shwile. Jeti ya lindwa yene kona ku ni fufisa mwa liholo ze silezi, kuzwa kwa Louisville kuya kwa München, Germany.

²⁰² Ki ha ni ya teni kwani, mi na kubama ka mañwele, mi se Nili, “Ndate, ki sikamañi se Ni lukela kubulela? Kubulela mwa mulomo wa ka.” Na si ka ni alaba. Ne ni ile mwa mushitu, Se nili, “Ndate, ki sikamañi se Ni lukela kubulela? Beya manzwi mwa mulomo wa ka. Ni kaya mwa mbango, ku si cwalo.” Se ni

kuta, Na si ka ni alaba. Taha kena. Ka busihu kaufela Na lapela, “Mulena, beya manzwi mwa mulomo wa ka.” Hakuna sene si alabilwe.

²⁰³ Habusa kakusasana musala ka a zuha. Amano ya fela, Linzwi (Na yema), Ki hali, “Usike wa halifela seo. Le ki lizoho la Mulena.” Uh-huh.

Mi kapili na byangula luwaile: “Hani koni kutaha. Batili, le ki lizoho la Mulena. Ni hanisizwe.” Mwa bona mata aliteni mwa kalimelo yani? Mi Mulimu hali, “Usike wa eza sakuli, kakuli ki lizoho la Mulena.”

²⁰⁴ Cwale, Mushe, nako yeñwi, na bulezwi kuli asike a eza sika, aya a yo ikezeza nihakulicwalo. Mwa hupula? Kacwalo Ne—Ne ni sika ya.

²⁰⁵ Mi Na kona ku mi tiseza litaba ku bonisa ka batu babane baba shutana, bene, ba bulezwi ki baalafi kuli ba shwile, kasamulaho wa tapelo ni kalimelo ya lifu. Mwabona? Lu yemanga fani ni ku kalimela sika sani. Mi haiba Mulimu u mi file mata a kueza sika, ulukela utokomele so eza. Mwabona? Ulukela utokomele ka- . . . Na ize, “Usike. . .”

²⁰⁶ Cwale, muhupule, sani ha si koni ku zamaelela ni mina ka tokomelo, kono ku na, ne si talusa taba yeñwi. Mwabona?

“Usike wa kalimela seo.” Ha munati luli, Linzwi la muhau (ka sikisi-seti, Na sepa neli yona, sikisi-seti kakusasana wani) ali, “Usike wa kalimela seo. Le ki lizoho la Mulena.”

Se nili, “Ni itumezi, Ndate. Ni itumezi, Mulena. Hanina kueza cwalo.”

²⁰⁷ Kabe Na bulezi kuli, “Kalimela seo. Yo ki sila ya icocomelize mwatani.”

Ne ni kali, “Ha luyeñi.” Mi ne ku ka fela.

²⁰⁸ Fani mushimani yomunyinyani yani mwa Finland hana lobezi fani, inza shwile, inza lubilwe, kusina nihaiba lisapo mwa mubili wa hae, Mulena abulela kuli lani neli lizoho la Satani, ali, “Si kalimele.”

²⁰⁹ Mi se Nili, “Lifu, haukoni ku mu swala. Mu kutise, mutuhele aikele.” Ona fani, a tula ka mautu, inza iketile, kusina nihaiba lisapo leli lobehile mwa mubili wa hae. Lani ki Linzwi la Mulena. Hanikoni kuitusisa Linzwi la Mulena konji haiba Linzwi la Mulena litaha ku na.

²¹⁰ Kono mwa Mañolo, Linzwi la Mulena li ni file tumo ya ku lapelela batu baba kula; u mi file tumo ya ku ba lapelela. Cwale, “tapelo ya tumelo ika pilisa ya kula;” halu lapeleni, mu inamise litoho za mina; luka bona sa Na bulezi, hamunze mu zwelapili.

²¹¹ U Mukreste, nji cwani? Wa lumela ka pilu ya hao kaufela kuli Jesu uka ku eza hande? Una ni butata nyana mwa mba; u

kulile ka lilimo zeñata nyana, kezeli. Cwale, uka ba hande, haiba u lumela.

²¹² Cwale, Mulena Mulimu, kalibe nyana yo ulukela kushwa kwanda kuli U mu tuse. Cwale Na lapela, ha Ni nze ni mutalima, Haniboni butokwa bwa kuli ashwe.

Mi Na ikutwa mwa moya waka, Mulena, kuli ki tato ya Hao ye lumelelizwe, cwale, kuli Ni laela kuli: Satani, mu tamulule!

Ka Libizo la Jesu Kreste, ha foliswe, atahe kwa keleke ye, mi afe bupaki kwa kanya ya Mulimu. Amen.

²¹³ Cwale, ka bunolo ona ku inezi cwalo, kalibe, uka foliswa. Kana wa lumela cwalo muzwale?

[Muzwale Branham u shenya kuzwa kwa maikulofoni—Mu.] Kikuli mwa lumela fafasi fo, kuli mukaba hande?

Zamaya cwale, u yo kalisa kuca lika kaufela . . . mi ukaba, fela hande.

Cwale, ha u libelela kufa lifasi butuku bwa luñañali, ni kuomelela; li kufa luñañali, ni kuku tokwisa mata. Cwale, Mulimu wa Lihalimu Ya zusa luñañali lwa lifasi ni kufa swalelo ya sibi, ka lona Libizo leliswana lani, wa kona ku mifa swalelo ya sibi, kuzusa luñañali ku wena, ni ku kueza hande.

Wa lumela kuli Wa kona kueza kuli pilu yani ibe hande? Wa eza cwalo, ukaba hande. . . ? . . .

²¹⁴ Mulena Jesu, musali ya shebile yo ulukela kusiya mwa sipula se bupilo bwa hae kaufela mi kasamulaho, a timele. Kono lu kupa kuli mata a Satani a zuswe ku yena. Hapile a zamaye mi abe ya i ketile sina mwa na belanga kamita. Lwa li kupa ka Libizo la Jesu. Amen.

²¹⁵ Mwa lumela? Ki musebezi o felile, u felile. Ki butata mañi? Hakuna sabo, hakuna . . . Ne si . . . ? No folisizwe kwa kansa nako yeñwi . . . ? . . . Tamuluha, u fe lika kaufela ku Jesu.

²¹⁶ Mulena Jesu, Ni beya mazoho aka ku musali yo ni ku kalimela butuku bwa hae. Na ziba ki Mukreste, upepilwe ka Moya. Ni bu zusa kuzwa ku yena, ka Libizo la Jesu Kreste Libizo lelinde. Amen.

²¹⁷ Mulena Mulimu, ka muzwale wa hae yomunde, Ni kupa puluso ya hae ka Libizo la Jesu. U yeme ku seo. Amen. Sika ezahala.

²¹⁸ Kikuli uitukisize kuamuhela foliso ya hao, mushimani? Ku likani, si ile kwa lizoho la Hae.

²¹⁹ Mulena Jesu, fahalimwa mucaha yo, yana ize, kuzwa ku Wena, ulapela kuli a amuhele foliso ya hae. Kakuba mutanga Hao, Ni beya mazoho aka fahalimwa hae ka Libizo la Jesu Kreste . . . ? . . . Amen.

Cwale, mañi kaufela . . . ? . . . cwale, ubize fela fa Libizo la Hae. Cwale, isiñi—isiñi ku na . . . ? . . .

²²⁰ Mulimu Ndate, sina fela mwana yakile a yendamena fa sifuba sa mahe, na mu nata nata ni—ni ku lapela ni yena ni kuswala lizoho la hae lelinyinyani hana sali mbututu yana sa zibi ku bulela. Cwale, Satani umubeile mwa buino bwa ku takana. Mulimu, utile kwa Keleke ye kenile ya Mulimu ya pila, Keleke ye pepilwe ka Moya wa Mulimu, Keleke yeo Moya wa Mulimu upila teni, ni kuikeza Iliyena ku zibahala. Mi kacenu, ka tapelo, lu lukulula musali yo mwa buino bwani. Ka Libizo la Jesu Kreste, lwa lapela. Amen.

Zamaya kwa hae, u iketile.

Ni itumezi kwa kutaha, ni kupa bo maho; yani ki mushimani yomunde.

²²¹ Le ki lizazi la ku tamuluha kwa hao. Mulena Jesu, ka mutangana yo, ka puluso ya muuna hae ni ku tamululwa kwa mumizo wa hae, hakone ku amuhela ka Libizo la Jesu Kreste, Yena ya bulela kuli “lutahe, inze lu lumela cwale,” mi ki sibyana se si felile.

²²² Mulena, ba alafi ba bulezi, Mulena, li mwa mubili wa hae, litaha mwa liito la hae. Utile kuli ato tamululwa, kwa aletare kwanu, sina Keleke ye kenile ye hainze i lapela, Ni kupa tukuluho ya hae ka Libizo la Jesu Kreste, butata bo buka siya mubili wa hae. Ki musebezi o felile kale.

Ka mwana hae wa mushimani, Ni fuyola taulo ye. Mi cwale kuutwa ni buino bo bunde bu kutele mwa zebe ya hae . . . ? . . .

²²³ Cwale Keleke ya bulela; cwale Keleke ki Mubili wa Kreste kunutu. Luna kaufela lwa ku lapelela. Mwabona? Halu ipuleli—halu ipuleli kuli lu mwa lifasi ni hanyinyani. Halu buleli ka kubilaela ko luya. Lu fumani Nzila. Ne lu pepezwi mwa Nzila yani. Lu Keleke ya Mulimu Yapila (siemba sa yona); kakuli, ihasani kai ni kai mwa lifasi. Kono se ki sikwata sa bona. Kacenu, hamoho lutaha ka Libizo la Hae. Lutulo eza sa Na bulezi kuli, lu eze. Sa Si ke ku patulula ha lu taha hamoho. Mu lapelele bakuli, mu ba beye mazoho, “tapelo ya tumelo ika pilisa ya kula.”

²²⁴ Butata bwa pilu ya hao ha bu zwe ku wena. Ka Libizo la Jesu Kreste, Ni utwela tumo yana ni file Mulimu . . . ? . . .



ZAZI LANI FA KALVARI LOZ60-0925
(That Day On Calvary)

Liñusa le ka Muzwale William Marrion Branham, neli kotalizwe lwa pili mwa Sikuwa la Sunda kakusasana, Muimunene 25, 1960, ili fa Branham Tabernacle mwa Jeffersonville, Indiana, U.S.A., liingilwe kuzwa fa tepu ya magesi ya manzwi ni ku hatisiwa kusina kuzusa sika mwateni kuya Sikuwa. Toloko ye ya mwa Silozi nei hatizizwe ni ku hasanyiwa kiba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitususwe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangeli ya Jesu Krete. Buka ye hailekisiwi, kuatiswa mwa buñata, ku nepelwa fa moya wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa mashelēni ku sina tumelelano niba Voice Of God Recordings®.

Ka litaba zeñata kamba ka libuka zeñwi ze liteni, shangwe muñolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org